

KITAB INYEL

MARKOS

PENULAU BECAKAP

Debaneng kaempat kitab inyel te kebukai, Kitab Inyel Markos to' te paleng panos aba' te paleng dulau datules. Inyel Markos mayoh bekisah kebala utai te nyaroh te dapulah Isa.

Yohanes mane' urang

(Luk. 3:3-6, 15-17)

1 To' mah semaru Brita Bayek tentang Isa Al Maseh, Anak Tuhan Allah.
² Brita Bayek to' nuna' te datules alam Kitab nabi Yesaya.

Nabi Yesaya nules apa te Tuhan Allah padah ke Anak Ya, upa pito' jako' Ya:

“Ku ka' ngutos siko' urang te dulau ari Meh,
aba' ya dulau ngageh jalai ngau Meh;*

³ urang nya' madah upa pito' ngau go' te sareng de
tanah luah te baengkerangan:

‘Ageh kah jalai ngau Tuhan Allah,
bujor kah jalai ngau Ya.’ ” *

⁴ Upa pito' jako' Yohanes Pemane' madah ngau go' te sareng de tanah luah te baengkerangan, “Dudi kebala dusa kita' aba' kita' alah depane', isa' Tuhan Allah ka' ngampon dusa kita'.” ⁵ Kebala urang ari uga' wilayah Yudia aba' kuta Yerosalem datai ngusong Yohanes ka' meda' aba' ka' ninga te depadah ya. Sida' ga' ngako' kebala dusa sida', aba' sida' depane' Yohanes de sungai Yordan. ⁶ Yohanes Pemane' ngau selawar baju te dapulah ari bulu unta, sementeng ya ari kulet jelu, pemakai ya buntak aba' ilap. ⁷ Yohanes madah pito' ga', “Nadai lama' age' te lebeh bekuasa ari ku ka' datai; datai

* 1:2 Mal. 3:1 * 1:3 Yes. 40:3

ke nensam muka' tali sepatu Ya mah ku nadai patot. ⁸ Ku mane' kita' ngau ai', uleh Ya ka' mane' kita' ngau Roh Kudus.”

Isa depane'

(Luk. 3:21-22)

⁹ Tengan nya' datai mah Isa ari Nasaret de wilayah Galelia, aba' Ya depane' Yohanes de sungai Yordan. ¹⁰ Breta Isa pansot ari ai', Ya meda' langet tebelah, aba' Roh Kudus upa burong dara turon ke atau Ya. ¹¹ Aba' tedinga go' Tuhan Allah ari sruga madah, “Meh mah Anak Ku te Ku kaseh, Ku aja gaga amat ke Meh.”

Ibles Kepala' bala sitan encuba Isa

(Luk. 4:1-13)

¹² Breta udah nya' Roh Kudus ngemai' Isa ke tanah luah te baengkerangan. ¹³ Diya' Ya dacuba Ibles Kepala' bala sitan slama' empat puloh ari. Ya diya' diyau daentara kebala jelu te ganas aba' kebala mlikat gintu Ya.

Isa ngajar urang banyau

(Luk. 4:14-15)

¹⁴ Udah Yohanes detangkap, Isa datai age' ke Galelia madah Brita Bayek ari Tuhan Allah. ¹⁵ Jako' Ya, “Ento' Pemrintah Tuhan Allah nyau ka' blaboh. Dudi kah kebala dusa kita' aba' pecaya' kah ke Brita Bayek ari Tuhan Allah!”

Isa mileh kebala muret Ya te semaru

(Luk. 5:1-11)

¹⁶ Tengan Isa bejalai da tisi danau besai Galelia, Ya meda' Simon aba' Andrias menyade' ya. Sniko' tangan nyala ikan de danau nya', nema nya' mah kreja sniko' ngenap ari. ¹⁷ Isa madah ke sniko', “Boh aba' Ku, blaboh ari sari to' sniko' nadai bekreja ngiga' ikan age', uleh Ku ka' nyuroh sniko' ngiga' kebala urang isa' pecaya' ke Ku.” ¹⁸ Ninga piya' sniko' sintak nudi jala aba' nrudi Isa. ¹⁹ Udah nya' Isa bejalai age', nadai jaoh ari teban nya', Ya meda' Yakubos aba' Yohanes, anak Sibedios, tangan nyemayek jala

alam prau. ²⁰ Isa sintak ngumai sniko' aba' sniko' nudi Sibedios apai sniko' alam prau aba' kebala anak buah, baro' udah nya' sniko' nrudi Isa.

Isa muru sitan de Kapernaom

(Luk. 4:31-37)

²¹ Isa aba' kebala muret Ya datai ke Kapernaom. Lam ari Sabat, sida' tama' ke alam rumah te jalai sida' Yahudi nyemah Tuhan Allah aba' Isa ngajar diya'. ²² Sida' ampal ninga jako' Ya, nema Ya ngajar upa urang te adai pengaruh; nadai upa kebala urang te ahli de alam kitab te datules Musa. ²³ Tengan nya' de alam rumah nya' adai siko' urang te desarong sitan, urang nya' enciak encrabak bluma' madah: ²⁴ “Isa sida' Nasaret, ngapa Wan kalot ke kami? Wan datai ka' munas kami? Ku tau' bada' Wan sapa. Wan te suci te deutos Tuhan Allah.” ²⁵ Uleh Isa merak ya, “Sunye', rari kah ari ya!” ²⁶ Sitan nya' nguncang tuboh urang nya' aba' bluma' enciak encrabak, sitan nya' rari ari urang nya'. ²⁷ Uga' urang ampal, bluma' nanya' ke pangan bukai, “Ngapa pito' weh? Lampar bekuasa te jako' Ya sampai bala sitan rari nuna' printah Ya.” ²⁸ Nya' mah nyuroh brita te udah dapulah Isa deras amat datang uga' urang de wilayah Galelia.

Isa nyemoh entua Simon aba' urang bukai

(Luk. 4:38-41)

²⁹ Uдах Isa, Yakubos aba' Yohanes kluar ari rumah te jalai sida' Yahudi nyemah Tuhan Allah, sida' angkat ke rumah Simon aba' Andrias. ³⁰ Diya' entua Simon te ino' tangan kredan. Aba' sida' sintak madah ke Isa. ³¹ Isa ngusong entua Simon aba' megai jari ya bluma' manto' ya angkat, tangan nya' kredan nya' semoh. Breta ya nyau semoh beburoh mah ya angkat ngadoh pemakai ke sida' te diya'. ³² Pas slepat petang, adai kebala urang datai ngemai' urang te pedeh tacah brena macam penyaket aba' te dasarong sitan ngusong Isa. ³³ Nya' mah nyuroh uga' urang te de kuta nya' sampai bekene' de mua rumah nya'. ³⁴ Isa nyemoh mayoh urang te pedeh tacah brena macam penyaket aba' muru mayoh sitan; Isa ngerot bala sitan nya' becakap, nema sida' tau' bada' sapa Ya.

Isa ngajar de kebala kuta bukai

(Luk. 4:42-44)

³⁵Lam-lam panam Isa dani aba' angkat kluar ari rumah ke teban te sunye', diya' Ya bradua. ³⁶Uleh Simon aba' kebala kawan ya ngiga' Ya, ³⁷nyau sida' betemu aba' Isa, sida' madah, “Uga' urang ngiga' Wan.” ³⁸Uleh Isa nyawot sida', “Boh kita angkat ke kebala kuta te kebukai te semak to', den Ku alah madah Brita Bayek ari Tuhan Allah ga', nema nya' mah nyuroh Ku datai ke dunia to'.” ³⁹Udah nya' Isa angkat ke uga' wilayah Galelia aba' Ya madah Brita Bayek ari Tuhan Allah de kebala rumah te jalai sida' Yahudi nyemah Tuhan Allah aba' muru bala sitan.

Isa nyemoh urang te kena' penyakit kulet kusta

(Luk. 5:12-16)

⁴⁰Adai siko' urang te kena' penyakit kulet kusta datai ngusong Isa, ya tesungkor de mua Isa bluma' minta' talau, jako' ya, “Pak, ente' Wan ka', pesti Wan talah nyemoh ku.” ⁴¹Meda' piya' timol pengaseh alam ati Isa, baro' Ya ngulor jari Ya, bluma' madah, “Ka' Ku, semoh meh.” ⁴²Skelen nya' mah ga' penyakit ensia nya' lenyau aba' ya semoh. ⁴³Isa nyuroh ensia nya' angkat bluma' ngentak nal ensia nya' jako' Ya: ⁴⁴“Nang meh nusoi ke urang bukai apa te udah Ku pulah ke meh, uleh ken kah meh nganya' dire' ke imam isa' ya tau' bada' meh nyau semoh. Aba' meh alah ngemai' kurban pesemah ke Tuhan Allah nuna' perintah Ya te datules Musa aba' pesemah nya' ngau tana ke urang bukai ente' meh nyau semoh.” ⁴⁵Uleh urang nya' angkat kiya'-kito' bluma' nusoi apa te udah dapulah Isa ke ya, nya' nyuroh Isa nitau' bibas tama' ke alam kuta age'. Isa aba' kebala muret Ya mileh diyau de luar kuta de teban te nise' urang, uleh amat piya' mayoh urang reya'-reto' datai ngusong Ya.

Isa nyemoh urang lumpoh

(Luk. 5:17-26)

2 Dua tiga ari udah nya', Isa datai age' ke Kapernaom, tangan nya' urang banyau ninga brita Isa adai de rumah. ²Keba' kebala urang datai sampai bekene' aba' nise' age' teban te puang, datai ke de mua pintu mah ga' penoh. Tengan nya' mah ga' Isa madah Brita Bayek ari Tuhan

Allah ke sida'. ³Tengan Isa becakup, datai empat urang te merangong siko' urang lumpoh ngemai' ngusong Isa. ⁴Uleh sida' nitau' tama', nema urang diya' lampar mayoh. Meda' piya' sida' nika' aba' nebok atap rumah nya'. Uдах nya' sida' ngulor urang lumpoh te tangan gale' de atau tikai ya, pas de mua Isa. ⁵Breta Isa meda' sida' ma pecaya' ke Ya, Isa madah ke urang lumpoh nya', "O nak, dusa meh udah deamon." ⁶Uleh diya' adai ga' dudok kebala urang te ahli de alam kitab te datules Musa, jako' alam ati sida': ⁷"Ngapa bah urang to' madah piya'? Brani amat mah Ya mlicak Tuhan Allah, pro' Tuhan Allah te tau' ngampon dusa urang." ⁸Uleh Isa tau' bada' ise' ati sida', keba' Ya madah, "Ngapa bah kita' miker te piya' alam ati kita'? ⁹Ni te lebeh mudah Ku padah kah: Dusa meh udah deamon, apa madah: angkat kah tikai meh aba' bejalai meh? ¹⁰Uleh to' Ku ka' kita' tau' bada', Ensia te datai ari Tuhan Allah bekuasa de dunia to' ngampon kebala dusa urang." Baro' Isa madah ke urang lumpoh nya': ¹¹"Angkat, katong kah tikai meh, pulai meh ke rumah meh!" ¹²Urang lumpoh nya' sintak diri, bluma' ngatong tikai ya angkat kluar dapeda' urang banyau te diya', uga' urang te diya' ma mah ampal bluma' adai prasa takot sida' muji Tuhan Allah, jako' sida', "Bedau kala' kita meda' utai te nyaroh upa to'."

Isa ngumai Liwi isa' nrudi Ya

(Luk. 5:27-32)

¹³Uдах nya' Isa angkat age' ke tisi danau, mayoh urang datai ngusong Ya aba' Ya ngajar sida'. ¹⁴Tengan Isa bejalai, Ya meda' Liwi siko' urang te tukang nageh pajak. Liwi nya' anak Alpios, ya tangan dudok de kantor ya, Isa madah ke ya, "Boh nrudi Ku!" Baro' Liwi diri aba' nrudi Isa. ¹⁵Pas tangan Isa aba' kebala muret Ya makai de rumah Liwi, diya' adai ga' kebala penageh pajak aba' kebala urang te dusa brama makai aba' sida', nema mayoh urang te nrudi Ya. ¹⁶Meda' piya' kebala urang te ahli de alam kitab te datules Musa aba' kebala urang ari klumpok Parisi betanya' ke kebala muret Isa, jako' sida', "Ngapa bah Isa makai breta brama aba' kebala penageh pajak aba' kebala urang te dusa?" ¹⁷Ninga piya' Isa nyawot sida', "Ukai urang angas te merlu enteri, uleh urang pedeh te merlu enteri; Ku datai nadai ngumai kebala urang te ngangap dire' bayek, uleh Ku datai ngumai kebala urang te dusa."

Puasa te deajar Isa

(Luk. 5:33-39)

¹⁸ Adai skale' pas kebala muret Yohanes aba' kebala urang Parisi tangan puasa, adai datai kebala urang ngusong Isa aba' nanya', “Ngapa kebala muret Yohanes aba' kebala muret urang Parisi puasa uleh kebala muret Wan nadai?” ¹⁹ Isa nyawot sida', “Piya' tau' kebala temuai puasa ente' urang tangan gawai belaki bini, ente' penganten te laki age' aba' sida'? Slama' penganten te laki nya' aba' sida', sida' nitau' puasa. ²⁰ Uleh jemah lah adai senta penganten te laki nya' deame' ari sida', tangan nya' mah sida' puasa. ²¹ Nise' urang te nampal baju te lama' ngau cebek kayen te baru. Nema kayen te ngau nampal nya' ka' ngerakedot aba' nyuroh te carek nya' empala besai. ²² Upa piya' mah ga' nise' urang te ngise' ai' angor baru ke alam badah lama', nema ai' angor te baru ka' ngeruap nya' nyuroh badah nya' pecah, ai' angor mes tesioh aba' badah ai' nya' sige' pecah. Ai' angor te baru alah datepo' de alam badah te baru ga'.”

Ensia te datai ari Tuhan Allah bekuasa nentu apa te tau' dapulah urang ari Sabat.

(Luk. 6:1-5)

²³ Adai skale' pas ari Sabat, ari sida' Yahudi nyemah Tuhan Allah, ari nya' Isa aba' kebala muret Ya mansa' blayan ganom, tangan sida' bejalai kebala muret Ya nguleh leka ganom. ²⁴ Meda' piya' kebala urang ari klumpok Parisi te diya' madah, “Ngapa bah kita' kreja de ari Sabat? Tuna' printah Tuhan Allah te datules Musa ngerot urang bekreja ari to'?” ²⁵ Isa nyawot sida', “Nadai piya' kita' kala' maca alam Kitab Suci, jalai Daod aba' urang te aba' ya nise' age' te dapakai aba' sida' lapar, ²⁶ Daod tama' ke kemah Tuhan Allah tangan nya' Abiyatar te betugas jadi Imam Besai diya', Daod ngame' ruti te udah daserah ke Tuhan Allah, tuna' ruti nya' nitau' dapakai bukai ari pro' kebala imam mah te tau' makai, aba' Daod mre' ruti nya' ke kebala urang te aba' ya?” ²⁷ Udah nya' Isa madah ke sida' age', “Ari Sabat dapulah ke ensia; bukai ensia te dapulah ke ari

2:21-22 Reti ari cebek kayen te baru aba' ai' angor te baru nya': Pengajar Isa. Reti ari baju te lama' aba' ai' angor te lama' nya': Pengajar aba' adat sida' Yahudi te lama'. Jadi pengajar Isa nya' nadai tucok aba' pengajar aba' adat sida' Yahudi te lama'.

Sabat. ²⁸Nah, Ensia te datai ari Tuhan Allah bekuasa ngatoh apa te tau' dapulah urang ari Sabat.”

Isa nyemoh urang pas ari Sabat

(Luk. 6:6-11)

3 Ari Sabat te bukai, Isa tama' age' ke rumah te jalai sida' Yahudi nyemah Tuhan Allah. Diya' adai siko' urang te temati jari sepiyak. ²Diya' adai ga' kebala urang te ngiga' penyalah Ya, isa' sida' tau' ngelapor Ya ke kebala pemimpen. Keba' sida' mrati mali Ya nyemoh urang te pedeh nya' ari Sabat. ³Isa madah ke urang te temati jari sepiyak nya', “Ayoh, diri de tengah ke meh!” ⁴Udah nya', Isa madah ke sida', “Ku nanya' ke kita' ni te tau' dapulah urang ari Sabat, mulah te bayek apa mulah te jat, nyelamat nyawa urang apa munoh urang?” Uleh sida' nya' sunye' mah. ⁵Bluma' ringat Isa nilek skamat sida', uleh Ya riyu ga', nema meda' penegel sida' te lampar gila'. Baro' Ya madah ke urang te pedeh nya', “Ulor kah jari meh!” Urang nya' ngulor jari, aba' jari ya sintak semoh. ⁶Udah nya' kebala urang ari klumpok Parisi angkat ari rumah te teban jalai sida' Yahudi nyemah Tuhan Allah nya', sida' sintak bapekat aba' kebala urang te nukong Herudes, kati cara sida' munoh Isa.

Isa nyemoh urang mayoh

⁷Udah nya' Isa aba' kebala muret Ya ngerari dire' ke tisi danau besai Galelia. Mayoh amat urang ari wilayah Galelia aba' Yudia datai nrudi Ya. ⁸Adai mayoh ga' te datai ari kuta Yerosalem, ari daerah Idumea, ari sebrang Yordan, aba' ari kuta Tiros aba' Sidon, nema sida' udah ninga uga' kebala te udah dapulah Isa. ⁹Meda' kebala urang mayoh amat diya', Isa nyuroh kebala muret Ya ngageh sute' prau ke Ya, isa' kebala urang te mayoh diya' nadai nyekot Ya. ¹⁰Nema sari nya' Isa nyemoh mayoh urang, keba' mayoh kebala urang te kena' brena macam penyaket sampai bepangke' bekene' ka' nyamah Ya. ¹¹Aba' pas kebala urang te desarong sitan meda' Isa, sida' tesungkor de mua Ya bluma' enciak encrabak, bala sitan nya' madah, “Meh mah Anak Tuhan Allah!” ¹²Uleh Isa ngerot kebala sitan nya' madah sapa Ya.

Isa mileh dua blas muret Ya

(Luk. 6:12-16)

¹³Nadai lama' udah nya' Isa nike' ke sute' buket, Ya ngumai kebala urang te dakedeka' Ya isa' datai ngusong Ya. ¹⁴Baro' Ya mileh ari antara sida' dua blas urang te aba' Ya sengabot, Ya ngutos sida' isa' madah Brita Bayek ari Tuhan Allah. ¹⁵Aba' Ya mre' sida' kuasa ngau muru sitan. ¹⁶To' nama kebala sida' te dapileh Isa; Simon te dagelar Ya Petros, ¹⁷Yakubos aba' menyade' ya Yohanes, sniko' anak Sibedios, aba' sniko' dagelar Ya Boanerges, reti nya' anak guntor. ¹⁸Baro' Andrias, Plipos, Bartolumios, Matios, Tumas, Yakubos anak Alpios, Tadios, Simon ari klumpok Silot, ¹⁹aba' Yudas Iskariot, te jemah lah ka' nyual Isa ke urang te areh ke Ya.

Isa aba' Belsebol

(Luk. 11:14-23)

²⁰Udah nya' Isa datai age' ke rumah teban Ya numpang bemalam. Mayoh kebala urang datai ngusong Isa sampai bepangke' bakene', nya' mah te ngasoh Isa aba' kebala muret Ya nadai sempat makai. ²¹Breta kebala keluarga Isa ninga brita nya', sida' angkat ka' ngame' Ya nema sida' miker Ya nyau mamau. ²²Tengan nya' datai ari Yerosalem kebala urang te ahli de alam kitab te datules Musa, sida' madah, “Ya desarong Belsebol* aba' Ya tau' muru bala sitan nema Belsebol Kepala' bala sitan te mre' kuasa ke Ya.” ²³Isa ngumai sida', aba' nusoi kisah empama ke sida' upa pito', “Piya' tau' Kepala' bala sitan muru sama dire'? ²⁴Ente' alam sute' pemerintah kebala urang te diya' bemunsoh pesti mah pemerintah nya' nadai betan lama'. ²⁵Ente' alam keluarga kebala urang te diya' areh ke pangan pesti keluarga nya' nadai betan lama'. ²⁶Upa piya' mah ga' alam pemerintah Kepala' bala sitan, ente' bala sitan diya' bemunsoh bunoh pesti mah pemerintah nya' nadai betan lama' aba' pesti mah punas. ²⁷Uleh datai ke siko' mah urang nise' te tau' tama' ke rumah urang te kuat aba' ngerampas kebala reta bena ya asa urang te kuat nya' nadai detamet dulau. Urang nya' alah detamet dulau baro' tau' tama' aba' ngerampas bala reta bena ya. ²⁸Ku madah ke kita', uga' dusa te dapulah urang aba' dusa mlicak Tuhan Allah tau' deampon. ²⁹Uleh ente' mlicak Roh Kudos

* 3:22 2Raj. 1:2-3

nadai tau' deampon, nema nya' dusa nise' pemado'." ³⁰ Isa madah piya' nema sida' madah Ya desarong sitan.

Inai aba' kebala menyade' Isa

(Luk. 8:19-21)

³¹ Baro' udah nya' datai mah inai aba' kebala menyade' Isa. Sida' nungo' de luar aba' nyuroh urang ngumai Ya. ³² Tengan nya' urang mayoh dudok ngelileng Isa. Sida' madah ke Ya, "Pak, inai aba' kebala menyade' Wan adai de luar. Sida' ka' betemu aba' Wan." ³³ Jako' Isa nyawot sida', "Sapa inai Ku aba' sapa kebala menyade' Ku?" ³⁴ Baro' Isa meda' ke kebala urang te dudok ngelileng Ya aba' Ya madah, "To' mah inai Ku aba' kebala menyade' Ku!" ³⁵ Urang te mulah apa te dakedeka' Tuhan Allah, nya' mah menyade' Ku te laki, nya' mah menyade' Ku te ino', nya' mah inai Ku."

Kisah empama urang te ngunsai beneh

(Luk. 8:4-15)

4 Adai skale' Isa ngajar age' da tisi danau Galelia. Mayoh amat kebala urang datai ke menatai begugo' ngelileng Ya. Meda' piya' Ya angkat dudok de sute' prau te de atau ai', uleh urang banyau nya' de darat. ² Isa mayoh ngajar brena macam ke urang alam kisah empama. Ya nusoi kisah empama ke sida' upa pito': ³ "Dinga kah! Adai siko' urang te beuma angkat ngunsai beneh de uma ya. ⁴ Jalai ya ngunsai, adai te laboh de tisi jalai. Baro' kebala burong datai aba' makai beneh nya' sampai mes. ⁵ Beneh kedua' laboh de tanah te bebatu te nadai mayoh tanah, bala beneh nya' deras matok, nema tanah mimet. ⁶ Uleh nyau mataari tumoh beneh nya' sintak layos udah nya' tengkereng jurok mati nema ya nitau' beurat de teban tanah te mimet. ⁷ Adai kedua' beneh laboh de tanah te beblayan dure', beneh nya' tumoh uleh dealet blayan dure', nya' nyuroh nitau' bebuah. ⁸ Adai ga' beneh te laboh de tanah te bayek, beneh nya' tumoh galak aba' bebuah, adai te tiga puloh kale' lipat, adai te enam puloh kale' lipat, aba' adai te seratos kale' lipat." ⁹ Uдах Isa nusoi kisah empama nya', Ya madah, "Sapa te adai peneng ngau ninga, dinga kah!"

¹⁰ Tengan Isa kedire', dua blas muret Ya aba' kebala muret Ya te bukai nanya' ke Ya, apa reti kisah empama nya'. ¹¹ Isa nyawot, "Kita' desadi

Tuhan Allah ngetau' upa apa Pemrintah Ya. Uleh ke urang bukai deajar ngau kisah empama, ¹²isa':

'Amat sida' meda', uleh sida' nadai amat-amat mrati,
 aba' amat sida' ninga, uleh nadai sida' nyarok,
 isa' sida' nadai bebalek ke Tuhan Allah aba' Tuhan
 Allah ngampon sida'.' »*

¹³Isa madah ke sida' age', "Ente' kita' nadai nyarok kisah empama to', kati kita' tau' nyarok kebala kisah empama te bukai? ¹⁴Urang te beuma ngunsai beneh nya', kebarat urang te madah apa te jako' Tuhan Allah. ¹⁵Beneh te laboh de tisi jalai, nya' kebarat urang te ninga apa te jako' Tuhan Allah, uleh Kepala' bala sitan datai ngame' apa te udah dedinga ari alam ati sida'. ¹⁶Beneh te laboh de tanah te bebatu nya', kebarat urang te ninga apa te jako' Tuhan Allah aba' sintak nrima' ngau ati gaga, ¹⁷uleh apa te jako' Tuhan Allah nya' nadai beurat de alam ati sida' nya' nyuroh sida' nadai tan lama'. Asa adai te medeh sida' tegal patoh ke Tuhan Allah, sida' sintak rari ari Tuhan Allah. ¹⁸Beneh te laboh de tanah te beblayan dure' nya', kebarat ke urang te ninga apa te jako' Tuhan Allah, ¹⁹uleh saban ke pengidop sida' aba' sida' ka' idop nyamai de dunia to'. Uga' nya' nekol apa te jako' Tuhan Allah bebuah alam idop sida'. ²⁰Beneh te laboh de tanah te bayek nya' kebarat ke urang te udah ninga aba' nrima' apa te jako' Tuhan Allah. Nya' nyuroh sida' bebuah, adai te tiga puloh kale' lipat, adai te enam puloh kale' lipat, aba' adai te seratos kale' lipat."

Kisah empama klita te datungkop ngau tepayan

(Luk. 8:16-18)

²¹Udah nya' Isa madah age', "Ente' urang nungon klita nadai rinah nungkop ngau tepayan, aba' rinah nepo' de baroh peninok, uleh ente' urang nungon klita alah datepo' de teban te tinge'. ²²Uga' te detapok ka' peda' jemah lah aba' uga' te nadai depadah sebedau nya' ka' deketau' aba' dabungkar jemahlah. ²³Sapa te adai peneng ngau ninga, dinga kah!"

²⁴Baro' Isa madah age', "Dinga kah bamat-amat apa te jako' Ku! Apa te ngau kita' nyukat urang, nya' mah ga' te dengau Tuhan Allah nyukat kita', aba' apa te ngau Tuhan Allah nyukat kita' lebeh berat age'. ²⁵Nema Tuhan Allah ka' namah pemenau' ke urang te ka' nyarok, uleh ke urang te

* 4:12 Yes. 6:9-10

ngai nyarok, Tuhan Allah ka' ngame' pemenau' te desangka' urang nya' empu ya.”

Kisah empama beneh te tumoh

²⁶ Isa nyamong cakap Ya age' alam kisah empama, jako' Ya, “Pemrintah Tuhan Allah kebarat siko' urang te beuma angkat ngunsai beneh de tanah te jalai ya beuma. ²⁷ Asa malam ya tinok, asa tawas ya dani. Ari beganti ke beganti beneh nya' matok aba' tumoh galak. Uleh urang nya' nitau' bada' kati cara kebala beneh nya' tau' matok aba' tumoh galak. ²⁸ Tanah nya' nyuroh beneh bebuah. Semaru beneh nya' matok, baro' tumoh tinge', baro' terbet, baro' bise' sakai jadi buah. ²⁹ Ente' ganom nya' nyau mudah, urang nya' blaboh ngetau, nema nya' nyau senta rama ngetau.”

Kisah empama ige' ensawi

(Luk. 13:18-19)

³⁰ Baro' Isa madah age', “Ngau apa weh kita tau' nyema' Pemrintah Tuhan Allah nya'? Aba' ngau kisah empama te ni kita tau' nyema' lah? ³¹ Pemrintah Tuhan Allah to' upa ige' ensawi te detamak de tanah. Ige' ensawi paleng met daentara beneh te adai de dunia. ³² Uleh asa ige' ensawi nya' detamak, ya tumoh galak ari utai darebos te kebukai aba' kebala burong tau' besarang de dan ya.”

³³ Isa mayoh ngajar sida' ngau kisah empama te upa nya' isa' sida' nyarok. ³⁴ Isa slareh ngau kisah empama asa ngajar kebala urang, uleh asa Ya aba' kebala muret Ya kedire' Ya madah reti ke sida'.

Isa nyuroh kude' aba' glumang bado'

(Luk. 8:22-25)

³⁵ Sari nya' ga' pas nyau slepat petang, Isa madah ke kebala muret Ya, “Boh kita nyemrang danau.” ³⁶ Baro' Isa aba' kebala muret Ya nike' ke prau te udah jalai Isa ngajar aba' sida' blayar nudi kebala urang banyau da tisi danau. Tangan nya' adai ga' kebala prau te bukai nrudi sida'. ³⁷ Nadai lama' udah nya' datai mah kude' te lampar betat nacah danau nya', nya' te nyuroh ai' beglumang besai, aba' ai' tama' prau sida', keba' prau sida' nyau ka' karam. ³⁸ Tangan nya' Isa tinok bebantal de buntot prau. Baro' kebala

muret Ya datai ngerak Ya aba' madah ke Ya, “Guru, Wan nadai iboh ente' kita mati?”³⁹ Ninga piya' Isa diri, Ya madah ke kude' aba' glumang ai' nya', “Jadi mah!” Tengan nya' kude' aba' glumang ai' sintak bado' seklen.⁴⁰ Uдах nya' Isa nanya' sida', “Ngapa bah kita' lampar takot? Ngapa bah kita' nadai pecaya' ke Ku?”⁴¹ Sida' empala takot aba' sida' ampal aba' nanya' ke pangan bukai, “Sapa bah ensia to', sampai kude' aba' glumang ai' nuna' te jako' Ya?”

Isa nyemoh urang te desarong sitan

(Luk. 8:26-39)

5 Uдах nya' Isa aba' kebala muret Ya datai ke tebeng sepiyak danau Galelia, de daerah te jalai urang Gerasa diyau.² Pas Isa turon ari prau, datai mah siko' urang laki te desarong sitan ari kubor ngusong Ya.³ Urang nya' diyau de kubor aba' nise' urang talah masong kaki aba' jari ngau rantai.⁴ Uдах kepa' kaki jari ya depasong ngau rantai, uleh ya talah mutos rantai nya', nya' nyuroh datai ke siko' mah nise' urang te talah ngetan ya.⁵ Tawas malam ensia nya' empitau ayau de kubor aba' bala buket bluma' enciak encrabak aba' malo' dire' ngau batu.⁶ Pas ya meda' Isa ari jaoh, ya beguai ngusong Isa baro' ya tesungkor de mua Isa,⁷ aba' ngau go' te sareng ya enciak encrabak, “Isa Anak Tuhan Allah te Ma Tinge', nang kalot ke ku! Ku minta', bedanyi ke Wan ke Tuhan Allah, Wan nadai mrisa ku!”⁸ Urang te desarong sitan nya' madah piya' nema Isa uдах mrintah sitan rari ari ya.⁹ Uдах nya', Isa nanya' ensia nya', “Sapa nama dire'?” Sawot ya, “Nama ku Legion.” Ya madah piya' nema sida' mayoh.¹⁰ Ya ngemon ke Isa, isa' Ya nadai muru bala sitan nya' ari daerah nya'.¹¹ Nadai jaoh ari nya' adai mayoh amat kebala babi te tangan ngiga' pemakai de kaki buket,¹² baro' bala sitan nya' ngemon ke Isa, jako' sida', “Asoh ja' kami pinah ke alam bala babi nya', isa' mah kami tama' kiya'.”¹³ Isa madah, “Au'.” Baro' kebala sitan nya' rari ari urang nya' aba' sida' tama' ke kebala babi. Uga' kebala babi nya' rari ke darong tama' ke danau, aba' mati tengelam. Pemayoh kebala babi nya' adai dua ribu iko'.¹⁴ Breta meda' piya', kebala urang te ngintu kebala babi nya' beburoh beguai ke kuta aba' kebala kampong te semak nya'. Sida' nusoi ke kebala urang apa te uдах sida' peda'. Baro' kebala urang te uдах ninga sida' nya' kluar ka' meda' apa te tejadi.¹⁵ Uдах nya', sida' datai ngusong Isa aba' sida' meda' urang

te udah desarong bribu-ribu sitan udah beselawar baju aba' nyau semoh, dudok nyemak kaki Isa. Meda' nya' sida' empala takot. ¹⁶ Kebala urang te udah meda' utai nya' ngau mata sida' kedire' nusoi ke kebala urang te datai kiya', apa te udah nacah urang te desarong sitan aba' te udah nacah kebala babi nya'. ¹⁷ Kebala urang te adai diya' nyuroh Isa angkat ari daerah sida'. ¹⁸ Tengan Isa nike' ke prau, urang te udah desarong sitan nya' ngemon ke Ya, jako' ya, "Tau' weh ku nrudi Wan?" ¹⁹ Uleh Isa ngai, Ya madah, "Pulai ja' meh ke rumah meh, ngusong urang te adai de kampung meh. Tusoi ke sida' uga' te udah Tuhan Allah pulah aba' pemayek ati Ya ke meh." ²⁰ Baro' urang nya' angkat pulai aba' nusoi de daerah Dekapolis apa te udah Isa pulah ke ya. Uga' urang te ninga ya teka ampal.

Isa nyemoh urang ino' te pedeh aba' ngidop anak Yairos

(Luk. 8:40-56)

²¹ Uдах nya' Isa aba' kebala muret Ya angkat age' nyemerang danau Galelia ngau prau. Mayoh urang beramai-ramai sampai bekene' datai ngusong Ya ke tisi danau. ²² Tengan nya' datai mah siko' urang kepala' rumah te jalai sida' Yahudi nyemah Tuhan Allah, nama ya Yairos. Pas ya meda' Isa, ya tesungkor de kaki Isa, ²³ aba' ya ngemon ke Isa, jako' ya, "Pak, anak ku te ino' poh amat mah, nyau ka' mati. Ku minta' tulong Wan datai ke rumah ku aba' jamah kah ya, isa' ya semoh aba' nadai mati." ²⁴ Baro' Isa angkat nrudi Yairos ke rumah ya. Mayoh amat urang nrudi Ya sampai sida' ngene' Ya. ²⁵ Daentara urang banyau nya' adai siko' urang ino' te udah dua blas taon saket dujoh. ²⁶ Ino' nya' kepa' berubat ngusong kebala enteri uleh ya empala pedeh aba' uga' reta bena ya mes. Amat piya' ya jong nadai semoh empala ya uyoh. ²⁷ Ino' nya' ninga brita Isa ari kebala urang. Nya' mah ngasoh ya nyelete' kebala urang mayoh te da belakang Isa bluma' ya nyemak Isa aba' ka' nego' jubah Ya. ²⁸ Jako' alam ati ya, "Asa ku tetego' ke jubah Ya, pesti ku tau' semoh." ²⁹ Breta ya nego' jubah Isa teka seklen nya' mah darah bado' keluar. Baro' ya ngasa tuboh ya udah semoh. ³⁰ Isa ngasa adai kuasa te kluar ari Ya. Baro' Isa malek ke tengah urang banyau nya', aba' nanya' ke sida' "Sapa te udah nego' jubah Ku?" ³¹ Kebala muret Ya nyawot, "Ngapa Wan nanya' sapa te

5:15 *bribu-ribu sitan* sama aba' Legion. Legion to' sute' klumpok prajuret Ruma te bejumlah 6.000 urang.

nego' Wan? Peda' Wan kebala urang lama' mayoh bekene' ngugo' Wan.”
³²Uleh Isa malek ngiga' sapa urang te udah nego' jubah Ya. ³³Breta ninga Isa nanya', urang ino' nya' tau' bada' apa te dapulah ya deketau' Isa. Ya begetar bluma' takot tesungkor de mua Isa bluma' ya nusoi apa te terjadi ke ya. ³⁴Baro' Isa madah ke ino' nya', “O nak, nema de' pecaya' ke Ku, de' udah semoh. Pulai ke de' ngau ati lantang.”

³⁵Tengan Isa age' becapap, adai kebala urang datai ari rumah Yairos kiya' aba' madah ke Yairos, “Anak wan nyau mati, nang ngaru Guru age'!”
³⁶Uleh Isa nadai iboh ninga te depadah kebala urang. Ya madah ke Yairos, “Nang takot, pecaya' ja'.” ³⁷Baro' Isa ngerot kebala urang nrudi Ya bukai ari Petros, Yakubos aba' menyade' ya te nama Yohanes. ³⁸Nyau sida' datai ke rumah Yairos, Isa meda' kebala urang te diya' nyabak ruwau-ruwau ke miyak nya'. ³⁹Baro' Isa tama' ke rumah nya' Ya madah ke kebala urang te diya', “Adu mah kita' nyabak. Miyak to' nadai mati ya bayah tinok mah.”
⁴⁰Uleh sida' ketawa' ke Isa.

Meda' piya' Isa nyuroh uga' sida' nya' kluar. Pro' Isa aba' apai inai miyak nya' aba' tiga iko' muret Ya mah te tama' ke pangken miyak nya'.
⁴¹Diya' Isa megai jari miyak nya' aba' madah ngau baasa Aram, “Talita kum.” Reti nya', “Dani, angkat ke de' nak.” ⁴²Tengan nya' teka dani mah miyak ino' nya' aba' sintak bejalai nema umor ya nyau dua blas taon. Kebala urang te adai diya' ma ampal. ⁴³Isa ngerot sida' madah ke urang apa te udah Ya puluh, baro' Isa nyuroh urang mre' miyak nya' makai.

Sida' Nasaret nadai pecaya' ke Isa

(Luk. 4:16-30)

6 Baro' Isa aba' kebala muret Ya angkat ke Nasaret teban jalai Ya dabesai. ²Pas ari Sabat, ari sida' Yahudi nyemah Tuhan Allah, Ya blaboh ngajar de rumah te teban jalai sida' Yahudi nyemah Tuhan Allah. Pas kebala urang te mayoh diya' ninga pengajar Ya sida' ampal bluma' madah, “Ari ni na' mah Ya boleh uga' nya'? Pemanai apa na' mah te dabre' ke Ya? Aba' kati na' mah Ya tau' mulah kebala utai te nyaroh?” ³Ukai piya' Ya to' tukang kayu, anak Maria, menyade' Yakubos, Yuses, Yudas aba' Simon? Aba' nadai piya' kebala menyade' Ya te ino' adai aba' kita?” Keba' sida' nadai ka' pecaya' ke Ya. ⁴Baro' Isa madah ke sida', “Diya'-dito' nabi depanang urang, uleh de kampong dire' aba' daentara dire' sebilek mah nadai.” ⁵Diya' datai ke sute' mah nise' utai te nyaroh ari Tuhan Allah

te dapulah Isa, bukai ari nyemoh dua tiga iko' urang te pedeh ngau cara ngletak jari Ya ke atau sida'. ^{6a}Ya ampal meda' sida' nadai pecaya'.

Isa ngutos dua blas muret Ya

(Luk. 9:1-6)

^{6b}Baro' Isa bejalai kelileng ari desa ke kampung bluma' ngajar. ⁷Ya ngumai dua blas muret Ya aba' ngutos sida' dua iko' dua iko', aba' mre' kuasa ke sida' ngau muru bala sitan. ⁸Ya madah ke sida' isa' nadai ngemai' kebala pemakai, kebala dumpet, duet slama' sida' bejalai, pro' tungkat mah te tau' debai', ⁹sida' tau' ngau sepatu, uleh nitau' ngau dua baju. ¹⁰Jako' Ya madah ke sida' age', "Ente' kita' udah datrima' de sute' rumah, diya' mah kita' diyau sampai kita' angkat ari nya'. ¹¹Aba' ente' kita datai ke teban urang te ngai nrima' kita' aba' ente' sida' ngai ninga kita', kluar ari nya' aba' tepau kah debu te lekat de kaki kita' ngau tana ke sida' jemah lah Tuhan Allah ka' ngukom sida'." ¹²Baro' muret Isa angkat aba' madah ke urang ente' sida' alah nudi kebala dusa sida'. ¹³Kebala muret Isa mayoh muru bala sitan aba' ngunsot binyak saiton ke kebala urang te pedeh aba' nyemoh sida' ngau kuasa Tuhan Allah.

Yohanes Pemane' dabunoh

(Luk. 9:7-9)

¹⁴Uga' kebala brita te udah Isa puluh kah nya' nyau datai ke peneng Herudes Antipas, nema Isa lama' nyau deklala urang diya'-dito'. Adai urang te madah, "Yohanes Pemane' udah idop age' ari entara urang mati! Keba' nya' Ya adai kuasa tau' mulah kebala utai te nyaroh." ¹⁵Adai keda' madah, "Ya nya' Elia!" Aba' adai ga' te kebukai madah, "Ya nya' sama aba' nabi te meliya'." ¹⁶Breta Herudes ninga utai nya', ya madah, "Ya nya' ukai nabi te meliya', Ya nya' Yohanes te udah ku pancong ke pala' uleh ya nyau idop age'."

¹⁷Nema sebedau nya' Herudes nyuroh urang nangkap Yohanes, ngerantai ya aba' majak ya ke alam penyara. Herudes mulah piya' tegal ya ngai derara Yohanes meda' ya jadi ke Herudias bini Plipos menyade' ya kedire'. ¹⁸Yohanes gah ngerara Herudes upa pito', "Nitau' meh jadi ke bini menyade' meh!" ¹⁹Nya' mah te ngasoh Herudias pedeh ati ke Yohanes aba' ngamo' munoh Yohanes, uleh nadai tau', ²⁰nema Herudes ngasoh urang ngelinong

Yohanes. Herudes takot ke Yohanes nema ya tau' bada' ente' Yohanes urang te kena' aba' suci. Uleh ente' ya ninga pengajar Yohanes, ati ya bingong uleh amat piya' ya gaga ninga Yohanes.

²¹ Kepanyai datai mah senta te bayek ke Herudias, nema tangan nya' Herudes mulah acara ngeraya ari ulang taon ya. Pas ari nya' Herudes ngunang kebala petinge' ya, kebala prajuret, aba' kebala urang te tepanang de Galelia. ²² Tengan acara nya', anak Herudias te dara bejuget de mua kebala temuai aba' nya' ngasoh ati Herudes aba' kebala temuai gaga amat. Raja Herudes madah ke miyak nya', "Pinta' ja' apa te dakedeka' de', pesti mah ku bre' ke de'!" ²³ Baro' Herudes bedanyi ke miyak nya' bluma' besumpah, jako' ya, "Apa ja' te dapinta' de' ke ku, biar mah setengah ari wilayah te ku printah kah, pesti ku bre' ke de'." ²⁴ Miyak dara nya' angkat aba' nanya' inai ya, "Nai, apa te alah ku pinta'?" Sawot inai ya, "Pala' Yohanes Pemane'!" ²⁵ Miyak nya' sintak ngusong Herudes aba' madah, "Ku ka' minta' pala' Yohanes Pemane' datepo' da lemidang bai' ke ku ento'!" ²⁶ Ninga te dapinta' ya, ati Herudes ma mah riyu. Uleh nema ya udah besumpah de mua kebala temuai, nya' nyuroh ya nitau' jalai ngai. ²⁷ Herudes sintak mrintah anak buah ya ngemai' pala' Yohanes Pemane'. Anak buah ya angkat ke penyara aba' mancong pala' Yohanes Pemane'. ²⁸ Ya ngemai' pala' nya' ngau lemidang aba' mre' ke miyak dara nya', baro' miyak dara nya' mre' ke inai ya.

²⁹ Breta kebala muret Yohanes ninga brita nya' sida' datai aba' ngame' bangkai ya, baro' mengale' de alam kubor.

Isa mre' makai lima' ribu urang

(Luk. 9:10-17)

³⁰ Kebala rasol te udah dautos Isa ke kebala kampong datai age' aba' nusoi ke Ya uga' te udah sida' puluh aba' ajar. ³¹ Mayoh amat urang te datai aba' pulai ngusong Isa aba' kebala rasol Ya, nya' ngasoh datai ke makai mah sida' nadai sempat. Keba' nya' Isa madah ke kebala rasol Ya, "Boh kita angkat ke teban te sunye' isa' kita' tau' kedire' aba' blepa!" ³² Baro' sida' angkat ngau prau ke teban te sunye'. ³³ Uleh pas sida' angkat mayoh urang te meda' sida' aba' tau' bada' kikai pemansang sida'. Keba' kebala urang te adai de wilayah nya', bejalai ngelampat sida' ari jalai darat, nya' ngasoh sida' dulau datai ari Isa aba' kebala rasol Ya. ³⁴ Pas Isa turon ari prau, Ya meda' urang uleh kepemayoh, tangan nya' timol pengaseh alam

ati Ya, nema sida' upa dumba te nadai daintu. Keba' Ya blaboh ngajar kebala utai ke sida'.

³⁵ Pas ari nyau slepat petang, kebala muret Isa datai aba' madah ke Ya, “Guru, teban to' sunye' aba' ari to' nyau ka' slepat petang. ³⁶ Suroh kah sida' angkat, isa' sida' tau' meli pemakai de kebala desa aba' de kebala kampong te semak to'.” ³⁷ Uleh Ya nyawot, “Kita' mah te alah mre' sida' makai!” Sawot sida', “Kati kami tau' mre' sida' makai? Alah keba' kami adai duet dua ratos dinar baro' mah kami talah meli pemakai ke sida'.” ³⁸ Uleh Ya madah ke sida', “Brapa ute' ruti te adai de kita'? Cuba peda' kah!” Udah mresa, sida' madah, “Lima' ute' ruti aba' dua iko' ikan.” ³⁹ Baro' Isa nyuroh uga' kebala urang nya' dudok baklumpok de atau rumpot. ⁴⁰ Baro' kebala sida' nya' dudok baklumpok, adai te seratos, aba' adai te lima' puluh iko' alam seklumpok. ⁴¹ Udah nya' Isa ngame' lima' ute' ruti aba' dua iko' ikan, Ya engkadah ke langet bradua ngucap sukor betrima' kaseh ke Tuhan Allah. Udah nya' Ya munga' ruti nya' aba' mre' ke kebala muret Ya, isa' sida' magi ke kebala urang nya'. Piya' ga' dua iko' ikan nya' debagi Ya ke uga' sida'. ⁴² Sida' makai sampai kenyang. ⁴³ Baro' kebala muret ngumpol pelebeh ari te depakai sida' adai dua blas raga' penoh ⁴⁴ Urang te makai ruti nya' adai lima' ribu urang laki.

Isa bejalai de atau ai'

⁴⁵ Udah nya' Isa sintak ngasoh kebala muret Ya nike' ke prau aba' dulau ge' angkat ari Ya nyemrang ke Betsaida, aba' Ya ngasoh kebala urang banyau pulai. ⁴⁶ Udah nya' Ya angkat ke buket aba' bradua diya'. ⁴⁷ Pas nyau malam, prau te detumpang kebala muret Isa nya' udah de tengah danau, uleh Isa age' de darat. ⁴⁸ Breta Ya meda' sida' uleh ke pemedeh bekayoh nema kude' betat datai ari mua sida', keba' nya' nyuroh sekitar jam tiga dinari Ya datai ngusong sida' bejalai de atau ai' uleh Ya mansa' sida' ja'. ⁴⁹ Breta sida' meda' Ya bejalai de atau ai', sida' ngangar Ya antu, baro' sida' mangkes nguwes, ⁵⁰ nema uga' sida' meda' Ya aba' sida' tekanyat ga'. Uleh Ya sintak becapak ke sida', “Tenang ja'! Ku to' Isa, nang kita' takot!” ⁵¹ Baro' Ya nike' ke prau ngusong sida', aba' kude' teka bado'. Sida' ma mah ampal aba' bingung. ⁵² Tegal ati sida' degel amat nya' ngasoh sida' nadai nyarok apa te udah dapulah Isa kelima' ruti.

Isa nyemoh urang de Genesaret

⁵³ Datai ke sebrang, Isa aba' kebala muret Ya singah de Genesaret aba' namet prau diya'. ⁵⁴ Breta sida' keluar ari prau, kebala urang tau' bada' ente' nya' Isa. ⁵⁵ Keba' sida' beguai kiya'-kito' bepadah ke uga' urang te adai de wilayah nya', aba' blaboh ngemai' kebala urang te pedeh de atau tikai ngusong Isa. Nema upa sengketa sida' mulah piya' ente' ninga brita Isa datai. ⁵⁶ Kikai ja' Ya angkat, ke kebala desa, kebala kuta, kebala kampung, urang nepo' kebala urang te pedeh de teban te jalai urang mayoh begugo', aba' minta' ke Ya isa' kebala urang te pedeh desadi nyamah jubah Ya. Uga' urang te nyamah Ya semoh.

Printah Tuhan Allah aba' adat basa sida' Yahudi

7 Adai skale' dua tiga iko' urang ari klompok Parisi aba' kebala urang te ahli de alam printah Tuhan Allah te datules Musa datai ari Yerosalem ngusong Isa. ² Sida' meda' dua tiga iko' muret Isa makai, uleh nadai bebasok jari nuna' prator agama sida'. ³ Kebala urang Parisi aba' kebala sida' Yahudi te ke bukai, ngai makai asa sida' bedau na' masok jari nuna' prator te udah deatoh. Nema sida' slareh patoh ke adat basa kebala puyang jagang sida'. ⁴ Sida' ngai makai kebala utai te dabeli de pasar asa bedau de basok. Aba' age' tubah mayoh kebala prator puyang jagang sida' te alah sida' tuna' kah; upa meda' prator cara sida' masok kebala pingan mangkok. ⁵ Keba' nya' kebala urang Parisi aba' kebala urang te ahli alam Prator Tuhan Allah te datules Musa nanya' ke Isa, “Ngapa kebala muret Wan ka' makai nadai masok jari dulau? Ngapa sida' ngai nuna' prator adat basa puyang jagang kita?” ⁶ Isa nyawot sida', “Amat mah pesau Tuhan Allah te depadah nabi Yesaya, kita' to' urang te budi-budi bayek! Adai datules:

‘Kebala bansa to' muji nyemah Ku ngau mulot gena mah,
uleh ati sida' jaoh ari Ku.

⁷ Pracuma mah sida' nyemah Ku,
nema kebala printah ensia te deajar sida', ukai Printah Ku.”*

⁸ Apa te Ku printah, kita' ngai nuna', uleh adat basa te dapulah ensia kita' tuna'.”

* 7:6-7 Yes. 29:13

⁹Baro' Isa madah age' ke sida', "Kita' panai amat, kita' budi-budi nuna' printah Tuhan Allah! Uleh prator te pengamat kita' tuna' kah te deajar puyang jagang kita'. ¹⁰Musa udah madah, 'Pulah ke te bayek ke apai inai kita! Aba' sapa ja' kita' te ngutok apai inai kita', alah daukom mati.' ¹¹Uleh kita' ngajar urang tau' sida' madah ke apai inai sida', 'Apa te ka' ku bre' ke wan, udah ku pesemah ke Tuhan Allah.' ¹²Nya' sama mah aba' kita' nyadi urang nya' nadai ngintu apai inai sida'. ¹³Pengajar te kita' ajar ke urang nya', nyuroh apa te depadah Tuhan Allah nadai dengau age'. Aba' age' mayoh kebala utai te upa to' te kita' pulah."

¹⁴Baro' Isa ngumai age' urang banyau aba' madah ke sida', "Dinga kah jako' Ku isa' kita' nyarok! ¹⁵Apa te urang pakai inom nadai nyuroh najes de mua Tuhan Allah. Uleh apa te urang padah aba' pulah, nya' te nyuroh urang najes." [¹⁶Asa kita' adai peneng ngau ninga, dingakah!] ¹⁷Pas Isa nudi urang mayoh nya' aba' tama' ke rumah, kebala muret nanya' ke Ya reti kisah empama te baro' udah Ya ajar kah. ¹⁸Sawot Isa, "Kita' nadai nyarok ga'? Nitau' kita' bada' apa reti te urang pakai inom nadai nyuroh najes de mua Tuhan Allah. ¹⁹Apa te kita pakai inom nya' tama' ke alam perot, nadai tama' ke alam ati, udah nya' keluar age' pas kita bira'." Isa madah piya', isa' urang tau' bada' uga' pemakai tau' uga' mah depakai. ²⁰Baro' Isa madah age', "Apa te keluar ari ati urang nya' te nyuroh urang najes ²¹nema ari alam ati timol kebala pemiker jat te nyuroh encuri, munoh, ²²besinah, nipu, menyai' urang bukai, aba' mulah uga' utai te jat, tama', iri ati, nise' basa, sumong, aba' ngai de ajar. ²³Uga' utai te jat nya' timol ari alam ati, aba' nya' mah te nyuroh urang najes."

Urang ino' ari daerah Penisia propinsi Siria te pecaya' ke Isa

²⁴Udah nya' Isa angkat ke daerah nyemak kuta Tiros. Ya tama' ke alam rumah aba' Ya ngai urang tau' bada' Ya diya'. Uleh Ya nitau' lama' gila' napok dire'. ²⁵Adai siko' ibo', anak ya desarong sitan. Breta ya ninga Isa diya', ya datai ngusong Isa aba' tesungkor de mua Ya, ²⁶bluma' minta' Isa muru sitan ari anak ya. Ibo' nya' ukai sida' Yahudi. Ya ari daerah Penisia propinsi Siria. ²⁷Baro' Isa madah ke ya, "Kebala miyak alah dabre' makai dulau. Nadai bayek ngame' pemakai kebala miyak ngau mre' ukoi." ²⁸Uleh ibo' nya' nyawot Ya, "Amat mah pak te jako' Wan. Uleh kebala ukoi de baroh mija sige' makai kebala tisa' pemakai te laboh uleh kebala miyak." ²⁹Baro' Isa madah ke ya, "Nema sawot wan upa piya', pulai ja' wan, sitan

nya' udah rari ari anak wan.”³⁰ Ibo' nya' pulai ke rumah, ya meda' anak ya tangan gale' de peninok ya, aba' sitan nyau rari ari anak ya.

Isa nyemoh urang te bangal aba' kanga'

³¹Udah nya' Isa angkat ari kuta Tiros. Ya mansa' kuta Sidon angkat ke danau besai Galelia. Ya mansa' wilayah te dasebot Dekapolis. ³²Diya' sida' ngemai' urang te bangal aba' kanga' ngusong Isa aba' sida' minta' Ya ngletak jari ke kebala urang te pedeh. ³³Isa ngemai' urang nya' angkat jaoh ge' ari urang banyau. Baro' Isa majak tunyok Ya kedua ute' lubang peneng urang nya'. Udah nya' Isa ngeludah aba' nyamah dilah urang nya'. ³⁴Baro' Isa engkadah ke langet, bluma' ngesoh penyuan Ya madah, “Eyata!” reti nya’ “Tebuka' mah.” ³⁵Tengan nya' ga' urang nya' sintak tau' ninga aba' ya nadai kanga' age'. Ya tau' temos becapak. ³⁶Isa ngerot sida' nusoi ke urang apa te udah ya pulah ke urang nya'. Uleh empala Isa ngerot, nya' empala sida' nusoi utai nya' ke urang bukai. ³⁷Uga' urang ampal aba' madah, “Uga' te dapulah Isa nya' bayek. Urang te bangal desuroh Ya tau' ninga aba' urang te kanga' desuroh Ya tau' temos becapak.”

Isa mre' empat ribu urang makai

8 Nadai lama' udah nya' adai mayoh urang datai ngusong Isa. Breta Isa meda' sida' nise' te depakai, Ya ngumai kebala muret Ya aba' madah: ²“Ku saja ma mah kaseh ke kebala urang banyau to'. Nyau tiga ari sida' aba' Ku aba' ento' sida' nise' te depakai. ³Ente' Ku nyuroh sida' pulai bedau makai, sida' tau' lupot de tengah jalai. Apa klage' daentara sida' adai rumah te jaoh.” ⁴Uleh kebala muret Isa nyawot Ya, “Teban te jalai kita to' sunye! Wan, dini kita tau' meli ruti ngau urang te pemayoh to'?” ⁵Isa nanya' sida', “Brapa ute' ruti te adai de kita'?” Sawot sida', “Tujoh ute'.” ⁶Baro' Isa nyuroh urang banyau nya' dudok de tanah. Ya ngame' ruti te tujoh ute' nya' aba' bradua ngucap sukor ke Tuhan Allah. Udah nya' Ya munga' ruti nya' aba' mre' ke kebala muret Ya, isa' sida' magi ke kebala urang banyau. Kebala muret Isa nuna' te dasuroh Ya ke sida'. ⁷De kebala muret Ya adai ga' dua tiga iko' ikan te engka' met. Isa bradua ngucap sukor ke Tuhan Allah, udah nya' Ya nyuroh muret Ya magi ke urang banyau. ⁸Uga' sida' makai sampai kenyang. Baro' kebala muret Isa ngumpol plebeh ruti aba' ikan adai tujoh raga'. ⁹Kebala urang te makai

diya' kurang lebeh empat ribu. Uдах nya' Isa nyuroh sida' pulai ke rumah sida' kedire'. ¹⁰ Uдах nya' Isa aba' kebala muret Ya nike' prau besai aba' angkat ke dairah Dalmanuta.

Urang ari klumpok Parisi encuba Isa

¹¹ Dua tiga iko' urang ari klumpok Parisi datai betengek aba' Isa. Sida' ka' encuba Ya, nya' nyuroh sida' minta' Isa mulah utai te nyaroh ari Tuhan Allah isa' sida' tau' bada' ente' Ya amat de utos Tuhan Allah ke dunia to'. ¹² Ninga piya' Isa ngeloh ke sida', jako' alam ati Ya, “Ngapa kita' te idop de jaman to' minta' ku mulah utai te nyaroh ari Tuhan Allah? Ku madah ke kita' Ku sama skale' nadai ka' mulah utai te nyaroh ari Tuhan Allah de tengah kita'.” ¹³ Uдах madah piya', Isa aba' kebala muret Ya angkat ari nya'. Sida' nyemerang danau.

Ragi urang ari klumpok Parisi aba' Herudes

¹⁴ Tangan nya' kebala muret Isa kelupa ngemai' ruti. Te adai de prau sida' pro' sute' mah ruti. ¹⁵ Baro' Isa madah ke sida', “Kita' alah ati-ati ke ragi urang ari klumpok Parisi aba' ragi raja Herudes.” ¹⁶ Kebala muret Isa nadai nyarok te jako' Ya keba' sida' madah ke pangan bukai, “Isa madah piya' tegal kita' nise' ngemai' ruti.” ¹⁷ Isa tau' bada' apa te decakap sida'. Ya madah, “Ngapa kita' becakap ke kita' nise' mai' ruti. Ukai nya' te de maksot Ku. Tuna' des kita' nyau tau' bada' aba' nyarok. Ma mah tumpol pemiker kita' weh? ¹⁸ Kita' adai mata ngapa nadai ngau meda'? Aba' kita' adai peneng ngapa nadai ngau ninga? Nadai piya' kita' ingat, ¹⁹ jalai Ku munga' ruti ngau lima' ribu urang teh? Brapa raga' penoh plebeh ruti te kita' kumpol kah?” Sawot sida', “Dua blas raga'.” ²⁰ “Jalai Ku munga' tujoh ute' ruti ngau empat ribu urang, brapa raga' plebeh ruti te kita' kumpol ke ari nya'?” Sawot sida', “Tujoh raga'.” ²¹ Baro' Isa nanya' sida', “Nyau kita' nyarok deh?”

Isa nyemoh urang te buta' de Betsaida

²² Nyau klama' Isa aba' kebala muret Ya datai ke kuta Betsaida. Diya' adai dua tiga iko' urang datai ngemai' siko' urang buta' ngusong Isa. Sida' ngemon ke Isa, isa' Ya nyamah urang te buta' nya'. ²³ Baro' Isa megai jari

ensia nya' aba' ngireng ya keluar ari kuta nya'. Baro' Isa ngeludah mata ensia nya' aba' nyamah ngau jari Ya. Udah nya' Isa nanya' ke ya, “Adai meh meda' utai?” ²⁴ Ensia nya' nilek ke mua, baro' ya madah, “Au'. Adai ku meda' urang bejalai; uleh sida' ke upa meda' kebala pon kayu mah te bejalai.” ²⁵ Baro' Isa nyamah mata ensia nya' age'. Breta udah nya' deh baro' ensia nya' bamat-amat meda' aba' semoh, nya' nyuroh ensia nya' tau' rantas amat meda' kebala utai. ²⁶ Udah nya' Isa nyuroh ya pulai ke rumah ya aba' madah, “Adu meh selagat bebalek ke kuta nya'.”

Petros madah Isa nya' mah Al Maseh

(Luk. 9:18-21)

²⁷ Udah nya' Isa aba' kebala muret Ya angkat ke kampong te semak kuta Kaisarea Plipi. De tengah jalai Isa nanya' sida', “Ente' jako' kebala urang sapa Ku to'?” ²⁸ Sawot sida', “Adai te madah Wan Yohanes Pemane', adai te madah Wan nabi Elia, aba' adai ga' te madah Wan salah siko' nabi te meliya' idop age'.” ²⁹ Baro' Isa nanya' age', “Ente' jako' kita' sapa Ku to'?” Sawot Petros, “Wan to' Al Maseh, Raja Penyelamat te udah dedanyi Tuhan Allah.” ³⁰ Baro' Isa ngerot sida' nusoi ke kebala urang sapa Ya nya'.

Isa madah pemedeh Ya aba' pematinya

(Luk. 9:22-27)

³¹ Udah nya' Isa blaboh ngajar kebala muret Ya, ente' Ensia te datai ari Tuhan Allah alah mayoh ngasa pemedeh, dakengai kebala urang tuwai bansa Yahudi, kepala' kebala imam, aba' kebala urang te ahli de alam printah Tuhan Allah te datules Musa. Ya ka' dabunoh, uleh ari ketiga lah Ya ka' idop age'. ³² Aja jelas amat mah te depadah Isa nya' ke kebala muret Ya. Keba' Petros narek Isa ke tisi ya aba' ngano' Ya, “Guru, adu Wan becakap munyi piya'.” ³³ Uleh Isa malek ke kebala muret Ya aba' merak Petros, “Rari ke ari to' Ibles, te meh piker ke nya' pemiker ensia, ukai pemiker Tuhan Allah.”

³⁴ Baro' Isa ngumai kebala muret Ya aba' kebala urang te diya'. Ya madah ke sida', “Ngenap urang te ka' jadi muret Ku nitau' idop nuna' peneka' ati dire', alah siap nangong saleb ya ngenap ari, aba' alah bamat-amat aba' Ku. ³⁵ Nema ngenap urang te ka' brusaha ngintu idop dire' de dunia to' nitau' jong idop aba' Tuhan Allah. Uleh sapa ja' te ka' nyerah idop dire'

tegal Ku aba' tegal nusoi Brita Bayek ari Ku, ya tau' jong idop aba' Tuhan Allah. ³⁶Engkapa' kita' boleh uga' ise' dunia to' ente' kita' nitau' jong idop aba' Tuhan Allah. ³⁷Nema idop aba' Tuhan Allah nitau' debayar ngau uga' utai te adai de dunia to'. ³⁸Ente' urang malu ngako' Ku aba' apa te Ku ajar kah, de jaman urang te jat to' aba' nadai setia ke Tuhan Allah; Ensia te datai ari Tuhan Allah sige' malu ngako' ya jemah lah, senta Ya datai daterudi kebala mlikat Ya alam kuasa te lampar trang ari sruga.”

9 Isa madah age' ke sida', “Ku madah ke kita', de pemayoh kita' te dito', adai lah te bedau mati sebedau meda' Pemerintah Tuhan Allah datai ngau penoh kuasa.”

Isa bebale' de atau buket

(Luk. 9:28-36)

²Nam ari udah nya', Isa ngemai' Petros, Yakubos aba' Yohanes nike' ke sute' buket te tinge'. Pro' sida' mah te diya' nise' urang bukai. Diya' sida' meda' Isa bebale' de mata mua sida'. ³Jubah Ya puteh bedawar, nise' urang de dunia to' te tau' mampo' baju te pemuteh nya'. ⁴Baro' tiga iko' muret Isa nya' meda' nabi Elia aba' Musa, sniko' tangan becakap aba' Isa. ⁵Meda' piya', Petros madah ke Isa, “Rabi, kami ma mah gaga adai dito' Wan. Kati ente' kami mulah langkau ngau kita' tiga, sebuah ngau Wan, sebuah ngau Musa, aba' sebuah ngau nabi Elia.” ⁶Petros madah piya' nema ya nitau' bada' ka' madah apa nema sida' tiga ma takot. ⁷Baro' udah nya' awan turon ke atau sida' aba' ngelikop sida'. Baro' sida' ninga go' ari alam awan nya' madah pito', “To' mah Anak te Ku kaseh, dinga kah apa te jako' Ya.” ⁸Sida' tiga' beburoh meda' sekamat sida', aba' sida' meda' pro' Isa mah te aba' sida'. Te kebukai nise' peda' age'.

⁹Baro' Isa aba' kebala muret nya' turon ari buket. Isa bepesau ke sida' isa' sida' nadai nusoi ke kebala urang apa te udah sida' peda' tade' sebedau Ensia te datai ari Tuhan Allah mati aba' idop age' ari pemat. ¹⁰Sida' patoh ke printah Ya nya'. Uleh sida' tiga nanya' ke pangan bukai apa reti idop age' ari pemat te jako' Isa. ¹¹Keba' sida' nanya' ke Isa, “Ngapa kebala urang te ahli de alam kitab te datules Musa madah ente' nabi Elia alah datai sebedau Al Maseh datai ke dunia?” ¹²Isa nyawot, “Amat kena' mah, Elia alah datai dulau ngageh kebala utai isa' jadi baru. Uleh ngapa adai datules alam Kitab Suci ente' Ensia te datai ari Tuhan Allah, Ya alah mayoh ngasa pemedeh aba' daplicak urang? ¹³Ku madah ke kita': Amat

mah Elia udah datai, aba' urang mulah te jat ke ya upa te udah datules de alam Kitab Suci.”

Isa nyemoh miyak te desarong sitan

(Luk. 9:37-43)

¹⁴Isa aba' tiga iko' muret Ya turon ari buket, aba' sida' pulai ngusong kebala muret Ya te kebukai. Pas nya' sida' meda' adai mayoh urang diya'. Kebala urang te ahli de alam kitab te datules Musa betengek aba' kebala muret te kebukai. ¹⁵Breta urang mayoh nya' meda' Isa, sida' ampal amat. Sida' beguai nyamot Isa. ¹⁶Baro' Isa nanya' ke muret Ya, “Apa te kita' tengek ke aba' sida'?” ¹⁷Siko' urang ari antara urang mayoh nya' nyawot, “Rabi, ku nganyong anak ku ngusong Wan. Ya biso' nema ya desarong sitan. ¹⁸Ngenap kale' sitan nyerang anak ku, sitan nya' ngempas ya ke tanah. Baro' mulot anak ku brepo', gigi ya begeret, aba' tuboh ya kejang. Ku udah minta' kebala muret Wan muru sitan nya', uleh sida' nadai talah.” ¹⁹Keba' Isa madah ke sida' “Kita' to' amat-amat urang te nadai pecaya! Sampai kmaya lah Ku alah sabar diyau daentara kita' baro' kita' bamat-amat pecaya' ke Ku?” Baro' Isa madah ke urang nya', “Bai' kito' miyak nya!”

²⁰Baro' urang banyau ngemai' miyak nya' ngusong Isa. Pas sitan meda' Isa, ya nguncang tuboh miyak nya'. Baro' miyak nya' laboh ke tanah begular galer. Aba' mulot ya brepo'. ²¹Baro' Isa nanya' apai miyak nya', “Nyau lama' ya desarong sitan?” Apai miyak nya' nyawot, “Blaboh ari ya engka' met. ²²Sitan nya' gah nibar ya ke alam api aba' muai ya ke alam ai' ngau munoh ya. Ku ngemon ke Wan kaseh ke kami to' aba' talau ke kami, ente' Wan talah nyemoh miyak to'!” ²³Isa nyawot ya, “Ngapa dire' madah, ‘Ente' Wan talah’? Tuhan Allah tau' mulah apa ja' ke urang te pecaya' ke Tuhan Allah!” ²⁴Apai miyak nya' madah ngau go' te sareng, “Ku pecaya! uleh amat piya' ku age' gama!” Keba' tamah kah iman ku isa' ku nadai gama' age'. ²⁵Isa meda' urang empala mayoh te datai kemenatai begugo'. Keba' nya', Ya merak sitan nya', jako' Ya, “Sitan te nyuroh urang biso' aba' bangal, Ku printah dire' rari ari miyak to', aba' nang tama' ke alam ya age!” ²⁶Sitan nya' enciak-ncerabak aba' nguncang tuboh miyak nya', baro' kluar ari ya. Miyak nya' peda' nyau upa bangkai, nya' nyuroh urang mayoh madah, “Ya udah mati.” ²⁷Uleh Isa megai jari miyak nya' aba' manto' ya diri. Baro' miyak nya' diri.

²⁸Isa aba' kebala muret Ya tama' ke sute' rumah. Pas nise' urang bukai aba' sida', kebala muret nanya' ke Isa, “Ngapa kami nadai talah muru sitan nya'?” ²⁹Isa nyawot sida', “Kita' tau' muru sitan te upa to' pro' ngau bradua.”

Isa madah age' kati upa pemat i Ya

(Luk. 9:43-45)

³⁰Isa aba' kebala muret Ya angkat ari nya' bejalai mansa' Galelia. Isa ngai daketau' urang sida' adai diya', ³¹nema Isa tangan ngajar kebala muret Ya ja', jako' Ya, “Ensia te datai ari Tuhan Allah ka' daserah ke peneka' kebala urang te bekuasa. Sida' ka' munoh Ya, uleh ari ketiga Ya ka' idop age'.” ³²Kebala muret Isa nadai nyarok apa te depadah Isa nya', uleh sida' nadai brani nanya' Isa.

Sapa te paleng penteng daentara kebala muret Isa

(Luk. 9:46-48)

³³Isa aba' kebala muret Ya datai ke kuta Kapernaom. Nyau sida' tama' ke sute' rumah, Isa nanya' sida', “Apa te decapak kita' de jalai tade' teh?” ³⁴Uleh sida' ngai nyawot, nema tade' teh de tengah jalai sida' udah betengek ke sapa te paleng penteng daentara sida'. ³⁵Isa dudok aba' ngumpol kedua blas muret Ya. Ya madah ke sida', “Sapa te ka' jadi urang te paleng penteng, ya alah ka' upa urang te nadai penteng, aba' ngelayan uga' urang.” ³⁶Baro' Isa megai jari siko' miyak aba' nyuroh diri de mua uga' sida'. Isa ngerengkon miyak nya' aba' madah ke kebala muret Ya: ³⁷“Urang te ka' nrima' urang te met upa miyak to' nema ya pecaya' ke Ku, nya' sama mah aba' ya nrima' Ku. Aba' urang te nrima' Ku ya bukai pro' nrima' Ku gena, uleh ya nrima' Tuhan Allah te ngutos Ku.”

Siko' urang te ukai muret Isa muru sitan

(Luk. 9:49-50)

³⁸Baro' Yohanes madah ke Isa, “Guru, kami adai meda' siko' urang muru sitan ngau nama Wan, uleh kami rot kah nema ya ukai ari klompok kita.” ³⁹Uleh Isa madah, “Nang ngerot ya. Asa urang tau' mulah te nyaroh ari Tuhan Allah ngau kuasa nama Ku, ya nitau' teka mang-mang mlicak

Ku. ⁴⁰Urang te nadai nentang kita, ya kawan kita. ⁴¹Ku madah ke kita', urang te mre' kita' nginom ai' segelas nema kita' daempu Al Maseh, urang nya' pesti ka' nrima' upah ari Tuhan Allah.”

Kebala utai te nyuroh urang mulah dusa

(Luk. 17:1-2)

⁴²Isa nyamong pengajar Ya age', “Ente' adai urang te nyuroh siko' ari kebala urang te met upa miyak te pecaya' ke Ku laboh ke alam dusa, age' kasa ente' batu besai detamet ke ler urang nya' aba' ya datibar ke laot. Uleh pemedeh nya' age' encade' ari ukom Tuhan Allah. ⁴³Ente' jari te nyuroh kita' mulah dusa, kempat kah jari nya'! Lebeh bayek kita' jong idop aba' Tuhan Allah sengabot idop ngau sute' jari, ari pada adai dua jari uleh tama' neraka, ke alam api te nitau' padam. [⁴⁴Diya' ulat te makai tuboh urang nadai tau' mati aba' api nya' te nitau' padam.] ⁴⁵Ente' kaki kita' te nyuroh kita' dusa kempat ja'! Lebeh bayek kita' jong idop aba' Tuhan Allah sengabot ngau sute' kaki ja' ari pada kita' adai dua kaki, uleh tama' neraka. [⁴⁶Diya' ulat te makai tuboh urang nadai tau' mati aba' api nya' nitau' padam.] ⁴⁷Ente' mata kita' te nyuroh kita' mulah dusa, kruweng kah mata nya'! Lebeh bayek kita' tama' ke Pemrintah Tuhan Allah ngau sute' mataari pada kita' adai dua mata, uleh dabuai ke alam api neraka. ⁴⁸Diya' ulat te makai tuboh urang nadai tau' mati aba' api nya' nitau' padam.*

⁴⁹Nema ngenap urang ka' dauji Tuhan Allah sida' mayoh ngasa pemedeh upa te angos uleh api.

⁵⁰Garam amat beguna, uleh ente' garam nyau tabar, nise' te tau' nyuroh ya masen age'. Kita' alah upa garam, aba' alah slareh idop damai aba' urang.”

9:42 *batu besai to' alam tek seli, batu te ngau ngileng ganom. 9:43* *kempat kah jari nya' Isa ngau baasa te blebeh-lebeh alam ayat 43, 45, 47 nya' ngau Ya nyelas lampar besai dusa nya'. Isa nadai tulu ka' nyuroh sida' ngempat kaki jari aba' ngeruweng mata sida', nema nya' nadai ngudah masalah dusa. Te dakedeka' Ya isa' sida' muai dusa te adai ati aba' pemiker sida'. Sida' alah nudi dusa, bebalek ke Tuhan Allah aba' idop nuna' kedeka' Ya.*

* **9:48** Yes. 66:24

Tau' nadai suwayak?

10 Ari Kapernaom Isa angkat ke wilayah Yudia aba' ke sebrang sungai Yordan, tangan nya' urang banyau datai bekene' ngelileng Ya. Aba' upa sengketa Ya ngajar sida'. ²Baro' datai mah kebala urang ari klompok Parisi encuba Isa, sida' betanya' munyi pito' ke Ya, “Ente' nuna' prator agama kita, tau' nadai urang nyuwayak bini dire'?” ³Uleh sawot Ya ke sida', “Apa perintah Musa ke kita?” ⁴Sawot sida', “Musa nyadi urang nyuwayak bini dire' uleh alah mulah surat suwayak.” ⁵Baro' Isa madah age' ke sida', “Musa nules perintah nya' nema tegal penegel ati kita' nadai talah ajar. ⁶Uleh ari semaru dunia to', Tuhan Allah mulah ensia laki aba' ino'. ⁷Urang laki ka' nudi apai aba' inai ya aba' sute' aba' bini ya, ⁸keba' sniko' jadi sute'. Sniko' nadai age' dua uleh sute'.” ⁹Nya' mah ngasoh apa te udah dasute' Tuhan Allah, nitau' dasuwayak ensia.”

¹⁰Nyau sida' datai ke rumah, kebala muret betanya' ke Isa soal utai nya'. ¹¹Baro' Isa madah ke sida', “Sapa te nyuwayak bini ya, udah nya' jadi ke urang ino' bukai, ya besinah ke bini ya nya'. ¹²Aba' ente' bini te nyuwayak laki ya aba' ya jadi ke laki te bukai, ya mulah sinah.”

Isa mre' berkat ke kebala miyak

(Luk. 18:15-17)

¹³Baro' urang ngemai' kebala miyak ngusong Isa, isa' Ya nyamah aba' mre' berkat ke sida', uleh kebala muret Ya ngano' kebala urang nya'. ¹⁴Breta Isa meda' te dapulah kebala muret Ya, Ya ngano' sida', jako' Ya, “Nang ngerot kebala miyak datai ngusong Ku, nema urang te upa kebala miyak to' mah te idop de alam Pemerintah Tuhan Allah. ¹⁵Ku madah ke kita', urang te nadai nrima' Pemerintah Tuhan Allah upa kebala miyak to', ya nitau' idop de alam Pemerintah Tuhan Allah.” ¹⁶Udah Ya madah munyi

10:4 *surat suwayak*. Surat ngau bukti te sah te dakluar uleh pengadilan agama ke urang te suwayak. Alam budaya/adat sida' Yahudi, urang ino' nitau' nyuwayak laki ya aba' nise' hak ngau minta' surat suwayak. Surat suwayak ukai ngau nyadi urang suwayak, uleh ngau tujuan nya' ngau ngelinong ino' ari kebala te garu atau kebala pemulah te jat ari awak laki ya aba' kebala urang bukai. Surat to' ga' nerang ke ente' ino' nya' nise' ikatan age' aba' awak laki ya teh. Jadi surat suwayak to' tau' ngau ngelinong hak ino' te desuwayak ya nya'.

* **10:8** Kej. 2:24

piya', Isa ngrengkon kebala miyak nya' aba' bluma' ngletak jari de atau sida' Ya mre' berkat ke sida'.

Urang kaya pedeh tama' ke Pemerintah Tuhan Allah

(Luk. 18:18-27)

¹⁷Tengan Isa bejalai, datai mah siko' urang beguai bluma' tesungkor de mua Isa, urang nya' nanya', "Guru te bayek, apa te alah ku puluh isa' ku tau' jong idop aba' Tuhan Allah sengabot?" ¹⁸Sawot Isa, "Ngapa piya' meh madah Ku bayek? Nise' urang te bayek bukai ari Tuhan Allah. ¹⁹Meh tau' bada' kebala printah Tuhan Allah, 'Nang munoh, nang besinah, nang encuri, nang madah utai te bula' tentang urang, nang nipu aba' patoh ke apai inai meh!' " ²⁰Baro' urang nya' nyawot Isa, "Guru, uga' nya' udah ku tuna' kah blaboh ari ku age' biyak." ²¹Isa ma mah kaseh ke urang nya' bluma' Ya madah, "Age' sute' te kurang, 'Angkat jual ke uga' apa te daempu meh aba' duet bre' ke kebala urang misken, aba' meh ka' buleh reta de sruga. Uдах nya' datai aba' terudi ke Ku.' " ²²Ninga Isa madah piya', urang nya' ma mah tusah, baro' angkat ngau pemedeh ati nema ya urang kaya.

²³Baro' Isa nilek ke kebala muret Ya aba' madah, "Ma mah pedeh urang kaya tama' ke alam Pemerintah Tuhan Allah." ²⁴Kebala muret Ya ampal ninga te jako' Ya, uleh Isa madah age', "Kebala anak Ku, ma mah pedeh tama' ke Pemerintah Tuhan Allah! ²⁵Lebeh mudah siko' unta tama' ke lubang jarom debaneng ke urang kaya tama' ke Pemerintah Tuhan Allah." ²⁶Sida' empala ampal ninga te jako' Isa, nya' ngasoh sida' mansen nanya' ke pangan, "Ente' piya', sapa te tau' slamat?" ²⁷Isa nilek sida' aba' madah, "Apa te nitau' dapulah ensia, tau' dapulah Tuhan Allah, nema pro' Tuhan Allah te tau' nyelamat ensia."

Upah nrudi Isa

(Luk. 18:28-30)

²⁸Baro' Petros madah, "Kami to' udah nudi kebala utai aba' nrudi Wan!" ²⁹Sawot Isa, "Ku madah ke kita', ngenap urang te tegal Ku aba' tegal madah Brita Bayek ari Tuhan Allah nudi rumah ya, menyade' ya te laki aba' ino', apai inai ya, kebala anak ya aba' uma ya, ³⁰ento' urang nya' ka' nrima' lebeh mayoh. Ya ka' nrima' seratos kale' lipat kebala rumah, kebala

menyade' te laki aba' ino', inai, anak aba' uma, amat mah bluma' ngau pemedeh. Aba' jemah lah ya tau' jong idop aba' Tuhan Allah sengabot. ³¹ Uleh urang te deangap urang nadai gulong penteng ento', jemah lah nya' mah te jadi urang paleng penteng de mua Tuhan Allah. Aba' urang te deangap urang paleng penteng ento', jemah lah nya' mah te jadi urang nadai penteng de mua Tuhan Allah.”

Isa madah apa te ka' nacah Ya de Yerosalem

(Luk. 18:31-34)

³² Isa aba' kebala muret Ya bejalai ke Yerosalem, tangan nya' Isa de mua sida'. Kebala muret te nrudi Ya ampal aba' kebala urang te nrudi Ya ari belakang ma takot. Baro' Isa ngumai kebala muret Ya aba' madah ke sida' apa te ka' nacah Ya de Yerosalem, ³³ jako' Ya, “Boh kita ke Yerosalem aba' den lah, Ensia te datai ari Tuhan Allah ka' daserah ke kebala kepala' imam aba' kebala urang te ahli alam kitab te datules Musa, aba' sida' ka' ngukom mati Ya. Aba' sida' ka' nyerah Ya ke kebala bansa te nadai nglala Tuhan Allah, ³⁴ sida' ka' mlicak Ya, ngeludah Ya, nyimat Ya ngau tali aba' munoh Ya, uleh ari ketiga lah Ya idop age'.”

Te dapinta' Yakubos aba' Yohanes

³⁵ Baro' Yakubos aba' Yohanes, anak Sebedios, ngusong Isa aba' madah, “Guru, kami ngarap Wan ka' mre' te kami pinta!” ³⁶ Isa nyawot sniko', “Apa te sniko' pinta' ke Ku?” ³⁷ Baro' sniko' madah, “Jemah lah ente' Wan mrintah jadi Raja, bre' ke kmua pangkat te penteng, siko' de sepiyak kanan aba' siko' de sepiyak kiba' Wan.” ³⁸ Uleh Isa nyawot, “Sniko' nitau' bada' apa te sniko' pinta'. Talah nadai sniko' nginom cawan te Ku inom kah aba' depane' ngau cara ku depane'?” ³⁹ Sawot sniko', “Kmu talah.” Isa madah ke sniko', “Amat mah sniko' nginom ari cawan te Ku inom aba' ka' depane' upa Ku. ⁴⁰ Uleh ukai Ku te ngatoh sapa te tau' dudok de sepiyak kanan aba' de kiba' Ku. Tuhan Allah te mre' pangkat penteng ke kebala urang te udah Ya atoh.”

⁴¹ Ninga apa te sniko' pinta' sepuluh muret te kebukai ringat ke Yakubos aba' Yohanes. ⁴² Uleh Isa ngumai sida' aba' madah, “Kita' tau' bada', kebala pemimpen de dunia to' te nadai nglala Tuhan Allah medeh kebala rakyat sida', aba' kebala penguasa kasar ke sida'. ⁴³ Uleh kita' nang upa piya'.

Sapa te ka' jadi pemimpin daentara kita', ya alah upa pemanto', ⁴⁴ aba' sapa te ka' jadi urang penteng daentara kita', ya alah upa urang te nadai penteng. ⁴⁵ Nema Ensia te datai ari Tuhan Allah, datai ke dunia to' ukai ka' delayan, uleh Ya datai ka' ngelayan urang aba' nyerah idop Ya ngau nebos mayoh urang ari dusa.”

Isa nyemoh Bartemios

(Luk. 18:35-43)

⁴⁶ Baro' datai mah Isa aba' kebalu muret Ya de kuta Yeriko. Breta Isa aba' kebalu muret Ya aba' urang banyau keluar ari kuta nya', diya' adai siko' urang te minta'-minta', ya buta' aba' tangan dudok de tisi jalai. Nama ya Bartemios, anak Timios. ⁴⁷ Breta ya ninga ente' te mansa' nya' Isa sida' Nasaret, ya mangkes jaku' ya, “Isa, pureh raja Daod, kaseh kah ke ku to'!” ⁴⁸ Mayoh urang te ngerara ya isa' ya sunye'. Uleh ya empala mangkes, “Isa, pureh raja Daod, kaseh kah ke ku to'!” ⁴⁹ Baro' Isa mentan aba' madah, “Kumai kah ya!” Sida' ngumai urang buta' nya' aba' madah ke ya, “Kuat kah ati meh, diri kah, Ya ngumai meh.” ⁵⁰ Baro' ya muka' jubah, ya sintak diri aba' angkat ngusong Isa. ⁵¹ Isa nanya' ya, “Apa te meh kedeka' kah ari Ku?” Sawot urang buta' nya', “Pak Guru, ku ka' tau' meda'!” ⁵² Baro' jaku' Isa madah ke ya, “Angkat, nema meh percaya' ke Ku, meh udah semoh!” Breta nya' mah ya sintak meda', baro' ya nrudi Isa bejalai.

Isa tama' ke Yerosalem

(Luk. 19:28-38)

11 Isa aba' kebalu muret Ya nyau semak Yerosalem, nyemak kampong Betpage aba' Betania de baroh buket Saiton. Diya' Isa nyuroh dua iko' muret Ya bejalai dulau, ² jaku' Ya, “Angkat dulau ke kampong te de mua kita to'. Pas sniko' tama' ke kampong nya' lah, sniko' meda' siko' keledai muda' te tangan detamet, bedau kala' adai urang nike' keledai nya'. Iret kah bai' ngusong Ku. ³ Asa adai urang nanya' ke sniko', ‘Ngapa sniko' ngemai' keledai nya?’ Padah kah, ‘Tuhan ka' ngau nya'. Ila' lah Ya ngasoh urang mulai keledai to' kito' age!’” ⁴ Dua iko' muret Isa nya' angkat aba' nemu siko' keledai muda' te tangan detamet de pintu rumah de tisi jalai, aba' ngelepas keledai nya'. ⁵ Dua tiga iko' urang te meda' sniko' nanya', “Ngapa sniko' ngelepas keledai nya’?” ⁶ Sniko' nya' nyawot

sida' munyi te Isa padah ke sniko'. Keba' kebala urang diya' nyadi sniko' ngemai' keledai nya'. ⁷Udah nya' sniko' ngemai' keledai nya' ngusong Isa aba' nyelap belakang keledai ngau jubah sniko'. Baro' udah nya' Isa nike' ke atau keledai nya'. ⁸Mayoh urang ngancau jubah sida' de jalai aba' adai te ngame' kebala pelepah te bedaon ijau ari uma aba' ngidar de tengah jalai. ⁹Kebala urang banyau bejalai aba' Isa, adai te de mua aba' adai ga' te nrudi Ya ari belakang. Sida' madah ngau go' te sareng:

“Puji Tuhan Allah!

Puji ke Ya te datai ngau Raja de alam nama Tuhan Allah.

¹⁰Lampar bayek Pemrintah Ya te ka' datai, te ka' upa pemrintah de jaman raja Daod, puyang jagang kita meliya'.

Puji Tuhan Allah te ma Tinge'!”

¹¹Isa datai ke Yerosalem aba' tama' ke Rumah Kudus Tuhan Allah. Diya' Ya meda' uga' utai te adai de semak Ya. Uleh nema ari nyau ka' malam, Ya kluar angkat aba' dua blas muret Ya ke Betania.

Isa ngutok pon ara

¹²Nyau lam Isa aba' dua blas muret Ya angkat ari Betania. De tengah jalai Isa ngasa dire' lapar. ¹³Ari jaoh Ya meda' sute' pon ara te tangan bedaon, Isa ngusong pon ara nya' aba' ka' ngiga' buah. Uleh pas Ya datai ke pon nya', Ya nise' nemu buah datai ke sige' mah nise', tulu bayah bedaon gena mah nema tangan nya' pas nadai tangan rama ara bebuah. ¹⁴Isa madah ke pon ara nya', “Blaboh ari sari to' nise' urang te makai buah dire' age'.” Kebala muret Ya ninga apa te jako' Ya nya'.

Isa tama' ke Rumah Kudus Tuhan Allah

(Luk. 19:45-48)

¹⁵Udah nya' Isa aba' kebala muret Ya datai ke Yerosalem. Isa tama' ke Rumah Kudus Tuhan Allah aba' blaboh nesar uga' urang te bejual beli de laman Rumah Kudus Tuhan Allah. Ya nunsang kebala mija te dengau urang nukar duet aba' kebala bangku te dengau urang nyual burong dara. ¹⁶Aba' Ya nadai nyadi kebala urang ngemai' barang mansa' laman Rumah Kudus Tuhan Allah. ¹⁷Udah nya' Isa ngajar kebala urang jako' Ya, “Adai datules alam Kitab Suci, ‘Rumah Ku to' rumah ngau uga' kebala bansa

bradua.' Uleh kita' pulah ke ngau sarang perampok.”* 18 Kebala kepala' imam aba' kebala urang te ahli de alam kitab te datules Musa ninga apa te depadah Isa. Keba' sida' brusaha ka' munoh Ya. Sida' takot ke Isa nema sida' meda' kebala urang tebelanga ninga pengajar Isa. 19 Pas tikop petang Isa aba' kebala muret Ya keluar ari kuta nya'.

Pon ara nyau mati

20 Nyau lam, Isa aba' kebala muret Ya mansa' pon ara te udah sida' pansa' ke kemare'. Sida' meda' pon ara nya' nyau mati datai ke kebala urat. 21 Baro' Petros ingat apa te depadah Isa ke pon ara nya' sari sebedau nya'. Petros madah ke Isa, “Guru, peda' Wan! Pon ara te Wan kutok kemare' nya' nyau mati.” 22 Isa madah ke kebala muret Ya, “Kita' alah pecaya' ke Tuhan Allah! 23 Ku madah ke kita', ente' adai urang te madah ke buket to', ‘Pinah aba' laboh kah ke laot!’ Puko' urang nya' pecaya' aba' nadai gama', apa te jako' ya nya' tejadi, pesti Tuhan Allah mulah utai nya'. 24 Keba' nya' Ku madah ke kita', apa ja' te kita' pinta' ke Tuhan Allah. Pecaya' ja' kita' udah nrima' te kita' pinta', pesti utai nya' debre' ke kita'. 25 Asa kita' bradua, ampon ke dulau penyalah urang ke kita' isa' Apai kita' te de sruga ngampon bala dusa kita'. [26 Uleh ente' kita' nadai ngampon urang te udah mulah penyalah ke kita', Apai kita' te de sruga ngai ga' ngampon kebala dusa kita'.”]

Urang nanya' ari ni kuasa Isa

(Luk. 20:1-8)

27 Isa aba' kebala muret bebalek age' ke Yerosalem. Tangan Isa bejalai de laman Rumah Kudos Tuhan Allah, kebala kepala' Imam agama Yahudi, kebala urang te ahli de alam kitab te datules Musa aba' kebala urang tuwai bansa Yahudi datai ngusong Isa. 28 Sida' nanya' ke Ya, “Ngau kuasa sapa Dire' mulah kebala utai to'? Sapa te mre' kuasa ngau mulah uga' utai nya'?” 29 Isa nyawot sida', “Ku sige' ka' ga' nanya' kita'. Ente' kita' ka' nyawot te detanya' Ku, baro' Ku madah ke kita' sapa te mre' kuasa ke Ku ngau mulah uga' utai to'. 30 Padah ke Ku, Yohanes mane' urang ngau kuasa ari sruga apa ari ensia?” 31 Kebala pemimpen nya' blaboh becakup

* 11:17 Yes. 56:7; Yer. 7:11

aba' pangan bukai. Sida' madah pito' "Ente' kita nyawot Ya ari sruga, pesti Ya madah, 'Ente' piya' ngapa kita' nadai pecaya' ke te jako' Yohanes?"³² Uleh pedeh ga' ente' kita madah, 'Ari ensia!' " Sida' takot madah piya', nema sida' takot ke urang banyau. Nema uga' urang madah Yohanes to' nabi.³³ Keba' nya' sida' nyawot Isa, "Kami nitau' bada'." Udah nya' Isa nyawot sida', "Ente' piya' Ku sige' ngai ga' madah ke kita' sapa te mre' Ku kuasa ngau mulah uga' nya'."

Kisah empama urang te empu kebon angor

(Luk. 20:9-19)

12 Udah nya' Isa blaboh becakap ngau kisah empama jako' Ya, "Adai siko' urang namak angor de kebon ya. Udah nya' baro' ya magar tisi kebon nya'. Ya ngali lubang ngau mulah teban merah buah angor, aba' mulah sute' menara ngau bejaga. Udah nya' ya nyiwa kebon angor nya' ke urang te ngintu kebon. Baro' udah nya' ya angkat ke menua bukai.² Pas senta buah angor mudoh, ya ngutos siko' pemanto' ya ngusong kebala urang te nyiwa kebon angor ya ngame' asel pemagi ari kebon angor nya'.³ Uleh kebala urang te nyiwa kebon angor nya' muyong pemanto' nya' aba' mangkong-malo' ya. Udah nya' sida' ngasoh ya pulai puang.⁴ Udah nya' urang te empu kebon angor nya' ngutos age' siko' pemanto' ya te kebukai ngusong kebala urang te nyiwa kebon nya'. Pemanto' nya' sida' pangkong palo' sampai bakal aba' sida' ngemalu ya.⁵ Urang te empu kebon angor nya' ngutos siko' age' pemanto' te kebukai, uleh pemanto' nya' sida' bunoh. Sida' mulah te serupa ke kebala pemanto' te kebukai. Adai pemanto' te depangkong palo' sida' aba' adai te sida' bunoh.⁶ Ento' semo' anak te ma ya kaseh mah te age' adai. Kujong ya ngutos anak ya nya' ngusong kebala sida' te nyiwa kebon angor nya', nema piker ya sida' pesti mah mulah te bayek ke anak ya.⁷ Uleh breta kebala sida' te nyiwa nya' meda' miyak te deutos nya' datai sida' madah ke pangan bukai, 'Peda'! Te empu kebon to' ngutos anak ya kedire', anak ya to' mah te empu kebon to' jemah lah. Boh kita munoh ya, isa' jemah lah kita te empu kebon to'!'⁸ Keba' sida' nangkap anak te empu kebon angor nya' aba' munoh ya. Udah nya' sida' muai bangkai ya keluar kebon angor nya'." ⁹ Udah Isa nusoi kisah empama nya', Ya nanya', "Ento' apa te ka' dapulah urang te empu kebon angor nya'? Ku madah ke kita' pesti ya datai aba' munoh kebala urang te nyiwa

kebon nya'. Uдах nya' kebon nya' ya bre' ke urang bukai. ¹⁰Kita' pesti dah maca to' alam Kitab Suci:

Tiang te dabuai kebala tukang rumah
udah jadi tiang tengah.*

¹¹Tuhan Allah mah te mulah uga' utai nya',
kita udah meda' lampu nyaroh utai nya'."

¹²Baro' Kebala pemipen Yahudi brusaha ka' nangkap Isa nema sida' tau' bada' sida' mah te de maksot Isa ari kisah empama nya'. Uleh sida' takot ke urang banyau keba' sida' angkat ari nya' nudi Isa diya'.

Kita alah mayar pajak skale' ke nadai

(Luk. 20:20-26)

¹³Uдах nya' kebala pemipen bansa Yahudi ngasoh kebala urang ari klumpok Parisi aba' kebala urang te nukong Herudes datai ngusong Isa becakup ka' ngiga' penyalah Ya. ¹⁴Sida' datai ngusong Isa aba' madah ke Ya, "Guru, kami tau' bada' Wan slareh madah utai te kena'. Wan nadai iboh ke apa te jako' urang. Wan nadai nyemeh mipeh urang, nema Wan nadai iboh urang nya' penteng ke nadai. Wan ngajar pengamat nuna' kedeka' Tuhan Allah. Ento' padah kah ke kami, ente' nuna' prator agama kita sida' Yahudi, tau' nadai kita mayar pajak ke Kaisar Ruma? Kita alah mayar pajak skale' nadai?" ¹⁵Uleh Isa tau' bada' sipat budi-budi bayek sida', Ya madah ke sida', "Ngapa kita' ka' encuba Ku? Bai' kito' sute' duet kereng dinar nya'!" ¹⁶Baro' sida' mai' sute' duet kereng dinar ngusong Isa. Ya nanya' ke sida', "Gamar aba' nama sapa te de duet to'?" Sida' nyawot Ya, "Gamar aba' nama Kaisar." ¹⁷Baro' Isa madah ke sida', "Bre' ke Kaisar apa te de empu Kaisar. Aba' bre' ke Tuhan Allah apa te jadi empu Tuhan Allah." Sida' ma ampal ninga Ya madah piya'.

12:10 *Tiang* harpiah: Batu. Alam budaya sida' Yahudi, sida' mulah rumah ngau batu, alam budaya Mualang urang mulah rumah ngau tiang. **12:10** *Tiang tengah* harpiah: Batu penjuru. Nya' ngau Isa nyelas Ya kedire', tiang tengah nya' Ya. Kebala tukang rumah nya' kebala pemipen sida' Yahudi, sida' ngai ke Ya, uleh Tuhan Allah ngangkat Ya.

* **12:10** Mas. 118:22

Urang Saduki nadai pecaya' ente' urang mati tau' idop age'

(Luk. 20:27-40)

¹⁸Adai skale' urang ari klumpok Saduki datai ngusong Isa. Kebala urang Saduki nadai pecaya' urang mati tau' idop age'. Sida' madah ke Isa: ¹⁹“Guru, Musa meliya' teh mre' prator upa pito' ke kita, ‘Ente' urang laki bebini uleh mati bedau nak adai anak, menyade' laki ya mah te alah jadi ke awak bini ya. Nema ngau cara nya' mah menyade' ya tau' mre' pureh ke menyade' ya te tuwai te nyau mati nya.’” ²⁰Empama teh adai tujoh iko' sida' menyade' laki uga'. Siko' te tuwai bebini. Uleh laki nya' mati bedau adai anak. ²¹Baro' menyade' laki ya te kedua jadi ke balu menyade' dire' te tuwai nya'. Uleh ya sige' mati sebedau adai anak. Upa piya' ga' menyade' ya te ketiga, ²²aba' kebala menyade' ya te kebukai, datai ke menyade' ya te ketujoh. Nyau klama' ino' nya' sige' mati. ²³Kati jemahlah pas senta urang mati idop age', ino' to' jadi ke sapa? Nema sida' tujoh menyade' nya' udah uga' mah jadi ke ya nya’.” ²⁴Isa nyawot sida', “Kita' salah, nema kita' nadai nyarok ise' Kitab Suci aba' nitau' bada' apa te Tuhan Allah talah puluh kah. ²⁵Pas senta kebala urang idop jemahlah, bayek laki bayek ino' nise' te belaki bini age'. Sida' ka' idop upa mlikat de sruga. ²⁶Ente' kita' bamat-amat nanya' kati urang mati ka' tau' idop age', pesti kita' udah maca alam Kitab te datules Musa. De alam Kitab nya' adai kisah tentang blayan dure' te beapi uleh nadai angos. Diya' datules, Tuhan Allah madah ke Musa, ‘Ku mah Tuhan Allah te dasemah Abraham, dasemah Isak, aba' dasemah Yakob.’” ²⁷Ya ukai Tuhan Allah te dasemah urang mati. Ya Tuhan Allah te dasemah urang idop. Kita' to' tulu amat nadai nyarok!”

Printah te paleng penteng

(Luk. 10:25-28)

²⁸Udah nya' siko' urang te ahli de alam kitab te datules Musa ninga Isa aba' kebala urang Saduki besual jawab. Ya tau' bada' Isa udah nyawot sida' ngau bayek. Baro' urang te ahli de alam kitab te datules Musa nya' nyemak Isa aba' nanya', “Printah ni te paleng penteng ari uga' nya'?” ²⁹Isa nyawot urang nya', “To' mah printah te paleng penteng, ‘Dingakah bansa Israel, Tuhan Allah nya' mah siko' iko' Tuhan te alah kita' semah. ³⁰Kaseh kah Tuhan Allah dire' ngau uga' ise' ati, uga' idop, uga' pemiker dire'

aba' uga' penganal dire'”³¹ Printah te paleng penteng te kedua nya' teh, ‘Kaseh kah kebala urang bukai sama upa meda' ngaseh dire' kedire'.’ Dua ute' printah to' mah te paleng penteng ari uga' printah te adai.”³² Baro' urang te ahli de alam kitab te datules Musa madah, “Kena' mah Guru, amat mah te jako' Wan nya' Tuhan Allah nya' siko' mah. Nise' Tuhan Allah te kebukai.³³ Aba' kita alah ngaseh Tuhan Allah ngau uga' ati kita, ngau uga' pemiker kita, ngau uga' penganal kita. Kita sig'e' alah kaseh ke urang bukai upa kita ngaseh dire' kedire'. Patoh ke kedua ute' printah nya' lebeh penteng ari mre' kurban te udah detunu aba' kurban te kebukai ke Tuhan Allah.”³⁴ Isa meda' ma mah bayek sawot urang nya', keba' Ya madah, “Dire' amper tau' jadi anggota Pemrintah Tuhan Allah.” Udah nya', nise' age' urang te brani betanya' ke Isa.

Isa aba' raja Daod

(Luk. 20:41-44)

³⁵ Jalai Isa ngajar urang banyau de Rumah Kudus Tuhan Allah, Ya nanya', “Ngapa kebala urang te ahli de alam kitab te datules Musa tau' madah ente' Al Maseh nya' pureh raja Daod? ³⁶ Daod kedire' dapimpen Roh Kudus madah upa pito':

‘Tuhan Allah madah ke Tuan ku:

Dudok kah Dire' de sepiyak kanan Ku,
sampai Ku ngasoh kebala munsoh Dire'
ngau pangal kaki Dire'.’

³⁷ Daod kedire' nyebot Al Maseh nya' Tuan ya. Kati Ya tau' pureh Daod?”

Urang mayoh te adai diya' gaga amat ninga Isa ngajar.

Isa ngajar isa' ati-ati ke urang te ahli de alam kitab te datules Musa

(Luk. 20:45-47)

³⁸ Baro' Isa nyamong jako' Ya, “Ati-ati kita' ke kebala urang te ahli de alam kitab te datules Musa. Sida' keran bejalai kiya'-kito' ngau jubah panyai. Sida' gaga asa kebala urang de jalai hormat ke sida'. ³⁹ Ente' sida' datai ke teban te jalai kita nyemah Tuhan Allah aba' teban urang gawai,

sida' keran dudok de mua. ⁴⁰Sida' nipu kebala balu, isa' sida' tau' ngame' reta bena empu kebala balu nya'. Ngau napok pemenyat dire', sida' asa bradua panyai-panyai. Tuhan Allah ka' ngukom sida' berat jemah lah.”

Pesemah ino' balu te misken

(Luk. 21:1-4)

⁴¹Adai skale' Isa de Rumah Kudus Tuhan Allah, Ya dudok semak badah teban ngau majak duet pesemah aba' meda' kati kebala urang majak duet ke alam badah nya'. Mayoh urang kaya majak duet kiya' aba' mre' mayoh. ⁴²Udah nya' siko' ino' balu misken datai ke teban nya'. Ya majak ke badah pesemah nya' dua ute' duet kereng te engka' met. ⁴³Keba' Isa ngumai kebala muret Ya aba' madah ke sida', “Ku madah ke kita', balu misken to' lebeh mayoh mre' ari pada sida' te kebukai. ⁴⁴Nema uga' sida' mre' ari plebeh duet sida'. Uleh balu to' ya mre' ari penise' ya, nya' mah engka' duet ya.”

Rumah Kudus Tuhan Allah ka' daruboh

(Luk. 21:5-6)

13 Jalai Isa aba' kebala muret Ya angkat ari Rumah Kudus Tuhan Allah, siko' muret Ya madah, “Guru, peda' kah! Kebala batu to' saja bayek, piya' ga' kebala Rumah to'!” ²Isa nyawot ya, “Peda' kah bamat-amat Rumah to', adai lah senta datai ke sige' mah nise' batu te denga' betipan age'. Uga' to' ka' daruboh.”

Pemedeh nrudi Isa

(Luk. 21:7-19)

³Udah nya' Isa aba' kebala muret Ya angkat nike' ke buket Saiton. Diya' Ya dudok de teban te tau' ngau Ya meda' Rumah Kudus Tuhan Allah. Baro' Petros, Yakubos, Yohanes, aba' Andrias datai becakap aba' Isa. ⁴Jako' sida', “Guru, padah ke kami, kmaya Rumah Kudus Tuhan Allah to' ka' daruboh? Apa tana te tau' kami peda' ente' senta nya' nyau datai?” ⁵Isa nyawot sida', “Ati-ati ja' nang sampai urang ngasoh kita' pecaya' ke kebala utai te nadai bamat. ⁶Mayoh urang ka' datai aba' madah dire', ‘Ku mah Al Maseh, Raja Penyelamat te dedanyi Tuhan Allah.’ Sida' ka' ngasoh

mayoh urang nrudi pengajar te salah. ⁷Asa kita' ninga urang beperang sama dire' aba' ninga brita ka' terjadi perang, nang kita' saban. Nema uga' utai nya' alah dulau datai. Amat piya', nya' ukai ga' breti nyau pemado' jaman. ⁸Bansa te sute' ka' nyerang bansa te kebukai. Menua te sute' ka' ngelawan menua te kebukai. Diya'-dito' ka' terjadi gempa bumi aba' urang nise' kebala te depakai, uleh pemedeh nya' baro' blaboh mah. Nya' sama upa urang ino' te pedeh perot ka' beranak.

⁹Uleh kita' alah ati-ati, kita' ka' detangkap aba' debai' ngadap kebala pemipen agama aba' kita' ka' depangkong palo' de kebala rumah te jalai sida' Yahudi nyemah Tuhan Allah. Kebala urang ka' nangkap aba' ngemai' kita' ngadap kebala urang te bekuasa, kebala raja. Uga' nya' kita' ka' asa kah nema kita' to' muret Ku. Uleh nya' mah senta ngau kita' nusoi Ku ke sida'. ¹⁰Aba' Brita Bayek ari Tuhan Allah alah depadah dulau ke kebala bansa. ¹¹Ente' kebala urang nangkap kita' aba' mai' kita' ngadap kebala pemipen isa' deadel, nang saban ke apa te alah kita' padah kah. Uleh padah kah apa te depadah Roh Kudus alam ati kita' tangan nya'. Nema ukai kita' kedire' te becakap nya', uleh Roh Kudus te ngasoh kita' madah utai nya'.

¹²Jemahlah adai kebala menyade' te ka' nyerah menyade' dire' isa' debunoh. Adai ga' apai te ka' nyerah anak ya isa' debunoh. Kebala anak sige' adai te ngelawan apai inai ya. Sida' ka' ngasoh urang munoh apai inai sida'. ¹³Uga' urang ka' areh ke kita' nema kita' muret Ku. Uleh urang te betan datai ke pemado' pesti daslamat.”

Pemedeh te ma amat aba' kebala urang te budi-budi jadi Al Maseh

(Luk. 21:20-24)

¹⁴Udah nya' Isa becakap age', “Kita' ka' meda' siko' urang te paleng jat te nyuroh uga' utai panas. Urang nya' ka' diri aba' ngejai' teban te tuna' nitau' detama' ya. (Te maca to' alah nyarok bamat-amat ke utai to'.) Pas nya' lah, kebala sida' de Yudia alah rari ke daerah te bebuket. ¹⁵Urang te adai de atap rumah nang turon ke alam rumah ngame' kebala utai. ¹⁶Urang te tangan de uma nang pulai ke rumah ngame' kebala selawar baju ya. ¹⁷Uleh kaseh bada' kebala ino' te tangan nganong aba' te nusu miyak rama nya'. ¹⁸Bradua kah ke Tuhan Allah isa' utai to' nadai terjadi rama ujan. ¹⁹Ku madah piya', nema rama nya' kebala urang ma mah pemedeh. Bedau kala' urang ngasa pemedeh te upa nya' blaboh ari Tuhan

Allah mulah dunia to' sampai ke ento'. Jemah lah sige' nadai urang ngamo' ngasa pemedeh upa to' age'.^{*} ²⁰Ente' pemedeh nya' nadai dejangka' Tuhan Allah, nise' urang tan idop. Uleh tegal kebala urang te dapileh Ya, Tuhan Allah ngemanos rama nya'.

²¹Ente' adai urang madah ke kita', 'Peda' Al Maseh, Raja Penyalamat adai dito!' Peda' Ya adai den!' Nang kita' pecaya' ke te depadah sida'." ²²Nema sida' nya' ukai Al Maseh aba' nabi. Sida' nya' Al Maseh aba' nabi te nesat urang. Sida' mayoh mulah utai te nyaroh ngau sida' nipu kebala urang te dapileh Tuhan Allah. ²³Kita' alah ati-ati. Ku dah madah uga' utai to' ke kita' sebedau uga' to' terjadi.

Penatai Ensia te datai ari Tuhan Allah

(Luk. 21:25-33)

²⁴Isa nyamong cakap Ya age', "Udah masa pemedeh nya', mataari nadai ka' besinar age', aba' bulan nadai bedawar age'. ²⁵Kebala piyanau ka' laboh ari langet, aba' kebala utai te adai de langet nadai tentu rudu. ²⁶Senta nya' mah kebala urang ka' meda' Ensia te datai ari Tuhan Allah, Ya ka' datai de atau awan ngau kuasa te lampar besai aba' besinar trang.* ²⁷Udah nya' Ya ka' nyuroh kebala mlikat Ya ngumpol kebala urang te Ya pileh. Sida' ka' dakumpol Ya ari uga' teban te de bumi, ari batas bumi te sute' sampai ke batas bumi te bukai.

²⁸Belajar kah ari pon ara. Asa kebala kantok ya nyau pansot, kita' tau' bada' nadai lama' age' ka' rama buah. ²⁹Piya' ga' asa kita' meda' uga' te Ku padah ke kita' tade' nya' terjadi, kita' tau' bada' senta nya' nyau ka' datai. ³⁰Ku madah ke kita' uga' nya' terjadi sebedau kebala urang jaman to' mati uga'. ³¹Langet aba' bumi ka' lenyau, uleh apa te Ku padah kah kena' sengabot.

³²Uleh nise' urang tau' bada' kmaya ari aba' senta utai nya' datai lah. Kebala mlikat de sruga nitau' bada', Anak sige' nitau' bada', pro' Apai Ku mah te tau' bada'."

* 13:19 Dan. 12:1; Why. 7:14 * 13:26 Dan. 7:13; Why. 1:7

Isa ngajar urang isa' bejaga sengabot

³³ Isa madah age' ke sida', jako' Ya, “Ati-ati ke kita' nyaga dire', nema kita' nitau' bada' kmaya senta utai nya' ka' datai. ³⁴ Penatai Ensia te datai ari Tuhan Allah tau' dasema' ke upa siko' urang te angkat ke menua bukai. Sebedau ya nudi rumah, ya madah tugas ke kebala pemanto' ya. Ya madah ke uga' pemanto' ya apa te alah sida' puluh kah slama' ya angkat. Uдах nya' ya madah ke te nyaga pintu, ‘Jaga kah pintu bamat-amat datai ke senta ku pulai age!’ ³⁵ Keba' nya' kita' alah slareh siap, nema kita' nitau' bada' kmaya te empu rumah nya' datai age'. Ya tau' datai pas baro' petang, malam, tengah malam, jaoh malam, aba' dinaari. ³⁶ Keba' kita' alah bejaga, isa' ente' ya nadai mang-mang datai, ya nadai nemu kita' tangan tinok. ³⁷ Apa te Ku padah ke kita' ento', Ku padah kah ke uga' urang ga': Kita' alah bejaga sengabot!”

Pengamo' urang ka' nangkap aba' munoh Isa

(Luk. 22:1-2)

14 Dua ari age' sida' Yahudi ka' ngeraya ari besai Paskah, aba' ari besai Ruti te nadai Beragi. Kebala kepala' imam agama Yahudi aba' kebala urang te ahli alam kitab te datules Musa ka' nangkap aba' munoh Isa. Uleh sida' ka' mulah utai nya' sunye'-sunye'. ² Sida' bepekat, jako' sida', “Adu kita nangkap Isa pas ari besai to', isa' urang banyau nadai ranseng aba' mulah ulah.”

Urang ino' nata' binyak wangi ke pala' Isa

³ Uдах nya', Isa aba' kebala muret Ya angkat ke kampong Betania. Den adai siko' urang laki te nama Simon. Dulau teh ya gah kena' penyaket kulet kusta. Pas Isa dudok makai de rumah Simon, siko' ino' datai ngusong Ya. Ino' nya' ngemai' sige' jebol te dapulah ari batu pualam te bise' binyak wangi narwastu te ma mahal. Uдах nya' ya matah ler jebol nya' aba' nata' binyak wangi nya' lubah-lubah ke atau pala' Isa. ⁴ Uleh adai dua tiga iko' urang te meda' utai nya' nadai gaga. Sida' ranseng bluma' madah,

14:3 Narwastu: to' binyak wangi te bau nyamai dapulah ari urat kayu narwastu. Kayu to' idop de kaki buket Himalaya de India.

“Engkapa' ngerua' binyak wangi narwastu te mahal nya' nah! ⁵Kasa jual kah. Baro' duet bre' kebala urang misken!” Udah nya' sida' ngano' ino' nya'. ⁶Uleh Isa madah ke kebala urang nya', “Nang ngaru ya. Jadi ngano' ya, apa te dapulah ke Ku nya' lampar bayek! ⁷Apa klage' kebala urang misken adai sengabot aba' kita'. Kebila kita' tau' nulong sida' kmaya ja' kita' ka'. Uleh Ku nadai aba' kita' sengabot. ⁸Urang ino' to' mulah apa te talah ya pulah kah. Ku bedau mati aba' dekubor, uleh ya nyau datai ngeminyak tuboh Ku, sama upa ngeminyak bangkai Ku. ⁹Ku madah ke kita', dini urang nusoi Brita Bayek tentang Ku de uga' dunia, pesti mah urang nusoi apa te dapulah ino' to'. Uga' urang ka' ngingat ya.”

Yudas ka' nyerah Isa

(Luk. 22:3-6)

¹⁰Baro' Yudas Iskariot salah siko ari kedua blas muret Isa angkat ngusong kebala kepala' imam nema ya ka' nyerah Isa ke sida'. ¹¹Kebala kepala' imam agama Yahudi gaga amat mah tangan nya' ninga te depadah Yudas. Sida' bedanyi ka' mre' duet ke ya. Udah nya' Yudas blaboh ngiga' senta te pas ngau nyerah Isa ke sida'.

Isa makai de ari Paskah sida' Yahudi aba' kebala muret Ya

(Luk. 22:7-14, 21-23)

¹²Pas senta semaru blaboh ari besai Ruti te nadai Beragi, urang munoh dumba ngau ngeraya Paskah sida' Yahudi. Kebala muret Isa nanya' ke Isa, “Guru, dini Wan ka' kami ngageh te depakai ngau ngeraya ari besai Paskah?” ¹³Udah nya' Isa ngutos dua iko' muret Ya aba' madah ke sniko', “Angkat ke sniko' ke kuta. Den lah sniko' betemu aba' urang laki te ngemai' labah bise' ai'. Terudi ke ya, ¹⁴aba' padah ke urang te empu rumah nya', ‘Guru nanya', dini teban te tau' ngau Ya aba' kebala muret Ya makai de ari Paskah?’ ¹⁵Baro' te empu rumah nya' ka' nunyok sute' teban te luah de tingkat atau. Ya udah ngageh teban nya' lengkap. Ageh kah te depakai ngau kita diya' senta ari besai Paskah.” ¹⁶Udah nya' dua iko' muret Isa nya' angkat ke kuta. Diya' sida' nemu uga' nya' percis upa te depadah Isa ke sniko'. Udah nya' sniko' ngageh te depakai ngau ngeraya Paskah. ¹⁷Nyau dah mataari padam, Isa aba' kedua blas muret Ya datai ke rumah nya'. ¹⁸Pas tangan sida' makai berama diya', Isa madah, “Ku madah bamat

ke kita', adai siko' ari antara kita' te ka' nyerah Ku ke kebala munsoh Ku. Urang nya' tangan makai breta Ku.”¹⁹ Pas ninga nya' kebala muret Isa ma riyu. Siko'-siko' sida' madah ke Isa, “Tuhan urang nya' pesti ukai ku!”²⁰ Isa nyawot sida' jako' Ya, “Urang nya' siko' ari antara kita' te dua blas muret Ku to'. Ya te encelop ruti aba' Ku ke pingan to'.²¹ Amat mah, Ensia te datai ari Tuhan Allah ka' mati upa te depadah alam Kitab Suci tentang Ya. Uleh urang te nyerah Ensia te datai ari Tuhan Allah nya' ma pemedeh! Lebeh bayek ente' ya nadai deadai de dunia to'.”

Danyi baru Tuhan Allah aba' ensia

(Luk. 22:15-20)

²² Pas sida' tangan makai Isa ngame' ruti aba' bradua ngucap sukor ke Tuhan Allah. Udah nya' Ya munga' ruti nya' ngau jari Ya aba' mre' ke kebala muret Ya. Ya madah, “To' kebarat tuboh Ku, ame' aba' pakai kah.”²³ Baro' udah nya' Isa ngame' sute' cawan te bise' ai' angor. Ya bradua ngucap sukor ke Tuhan Allah. Udah nya' Ya mre' cawan nya' ke kebala muret Ya. Udah nya' sida' begante' nginom angor ari cawan nya'.²⁴ Baro' Isa madah ke sida', “To' kebarat darah Ku. Darah to' ngau ngelai' danyi baru Tuhan Allah aba' ensia. Darah to' dasioh ngau nyelamat mayoh urang.²⁵ Ku madah ke kita', blaboh ari sari to', Ku nadai ka' nginom ai' angor to' age'. Ku ka' nginom ai' angor age' lah nungo' senta Pemerintah Tuhan Allah datai.”

Petros madah dire' nadai ngelala Isa

(Luk. 22:31-34)

²⁶ Baro' sida' menanyi muji Tuhan Allah. Udah nya' sida' angkat ke Buket Saiton.²⁷ Udah nya' Isa madah ke kebala muret Ya, “Uga' kita' ka' nudi Ku upa te datules alam Kitab Suci, ‘Tuhan Allah ka' munoh urang te ngintu dumba aba' dumba nya' ka' ngerari dire' kiya'-kito!’.”²⁸ Uleh Tuhan Allah ka' ngidop Ku age!. Keba' Ku ka' angkat ke Galelia dulau lai aba' kita ka' betemu den.”²⁹ Petros madah ke Isa, “Amat mah sida' ka' nudi Wan, uleh ku nadai nudi Wan.”³⁰ Isa madah ke ya: “Dinga kah! Malam to' lah sebedau manok engkukok dua kale', udah tiga kale' meh

madah dire' nadai nglala Ku.”³¹ Empala tegas Petros nyawot Isa, “Amat mah ente' ku alah mati aba' Wan, ku nadai ka' madah ku nadai nglala Wan.” Kebala muret Isa te kebukai sige' madah piya'.

Isa bradua de kebon Getsemani

(Luk. 22:39-46)

³² Isa aba' kebala muret Ya datai ke sute' kebon te nama Getsemani. Isa madah ke kebala muret Ya, “Dito' mah kita' dudok. Ku ka' angkat bradua.”
³³ Isa ngemai' Petros, Yohanes, aba' Yakubos aba' Ya. Isa sige' nyau ngasa saban aba' tusah. ³⁴ Ya madah ke sida', “Ati Ku ancor nema tusah, asa nyau ka' mati. Dito' mah kita' bejaga, nang tinok!” ³⁵ Isa bejalai niba jaoh ge' baro' belutot sampai mua Ya ngena' tanah jalai Ya bradua. Ya minta' ke Tuhan Allah isa' ente' tau', Ya nadai alah ngasa pemedeh nya'. ³⁶ Ya madah, “O Apai, Apai Ku, Wan talah mulah apa ja'. Talau kah Ku, ente' Wan ka', ame' ke pemedeh to' ari Ku. Uleh nang mah te Ku kedeka' te tejadi, uleh puluh kah apa te Wan kedeka'.”

³⁷ Udah nya' Isa angkat ngusong ketiga muret Ya. Ya nemu sida' tangan tinok. Ya nanya' ke Simon Petros, “Simon, ngapa meh tinok? Amat-amat mah meh nadai talah tan age' bejaga sejam ja'?” ³⁸ Baro' Isa madah ke kebala muret Ya, “Kita' alah bejaga aba' bradua sengabot, isa' kita' nadai laboh ente' dacuba. Ati kita' amat mah ka' mulah te kena', uleh tuboh kita' lemah.” ³⁹ Udah nya' Isa angkat niba jaoh siket ari sida'. Ya bradua ke Tuhan Allah ngau jako' te sama upa te udah. ⁴⁰ Baro' Ya bebalek age' ngusong ketiga muret Ya. Ya nemu sida' tangan tinok age', nema sida' ma ngantok. Jalai Ya ngerara sida', sida' nitau' bada' kati nyawot Ya. ⁴¹ Jalai Isa angkat bradua ngau ketiga kale' nya' aba' Ya bebalek ngusong ketiga muret Ya nya', Ya madah ke sida', “Kita' age' tinok aba' blepa? Ento' jadi mah. Kita' alah tau' bada' ento' udah senta Ensia te datai ari Tuhan Allah daserah ke alam peneka' kebala urang te dusa. ⁴² Ayoh diri, boh kita angkat! Peda' nya' mah urang te ka' nyerah Ku!”

Isa detangkap*(Luk. 22:47-53)*

⁴³Tengan Isa age' becakap Yudas datai kiya'. Yudas to' salah siko' ari dua blas muret Isa. Yudas datai aba' kebala urang banyau te ngemai' pedang aba' kayu te ngau mangkong-malo'. Kebala urang nya' teh urang te dasuroh kebala kepala' imam agama Yahudi, kebala urang te ahli de alam kitab te datules Musa, aba' kebala pemimpén sida' Yahudi. ⁴⁴Yudas urang te nyual Isa, ya udah madah ke sida' kati isa' sida' tau' bada' sapa urang te alah sida' tangkap. Yudas madah ke sida', "Urang te ku siom ke pipi, nya' mah Ya urang te kita' giga! Tangkap kah Ya. Ireng kah Ya angkat aba' jaga ke Ya bayek-bayek!" ⁴⁵Pas Yudas datai ke teban nya', ya lansong nyemak Isa. Yudas madah, "Rabi ku!" Baro' ya nyiom pipi Isa. ⁴⁶Baro' kebala urang te aba' Yudas nya' nangkap Isa aba' ngetan Ya. ⁴⁷Uleh siko' urang te adai diya' nyerang ngau pedang aba' mantap pemanto' Imam Besai kena' peneng ya sampai putos. ⁴⁸Isa madah ke sida' "Sangka' kita' Ku to' perampok, sampai kita' datai ngemai' kebala pedang aba' kayu ngau mangkong-malo', ngau nangkap Ku? ⁴⁹Ngenap ari Ku aba' kita' de laman Rumah Kudus Tuhan Allah ngajar urang banyau. Ngapa kita' nadai nangkap Ku? Uleh ento' tangkap kah Ku, isa' apa te datules alam Kitab Suci temo'."

⁵⁰Udah nya' kebala muret Isa rari nudi Ya.

⁵¹Tengan nya', adai siko' pemuda' te nrudi Isa. Pemuda' nya' ngau kayen puteh nutop tuboh ya aba' kebala urang te dasuroh kebala kepala' imam ka' nangkap ya. ⁵²Uleh ya nyiah kayen nya' bluma' rari telanyang.

Isa de mua Pengadel Agama Yahudi*(Luk. 22:54-55, 63-71)*

⁵³Udah nya' Isa deireng ke rumah Imam Besai. Uga' kepala' imam agama Yahudi, pemimpén sida' Yahudi, aba' urang te ahli de alam kitab te datules Musa tengán begugo' diya'. ⁵⁴Petros nrudi Isa ari jaoh aba' tama' ke laman rumah Imam Besai. Diya' ya dudok semak api ungon ngau ngangat tuboh ya paba' kebala te nyaga diya'. ⁵⁵Kepala' imam aba' uga' anggota te bukai alam Pengadel Agama, ngiga' kebala urang te ka' desuroh nudoh Isa ngau bukti Ya udah mulah penyalah isa' Ya daukom mati. Uleh sida' nadai nemu bukti. ⁵⁶Mayoh urang becakap bula' ngau

nudoh Isa, uleh te datudoh sida' tulen betentang. ⁵⁷Baro' kujong eh adai urang angkat diri ngemula' tentang Isa. Sida' madah pito': ⁵⁸“Kami ninga Urang to', Ya madah pito', 'Ku ka' ngeruboh Rumah Kudus Tuhan Allah te dapulah ensia. Alam tiga ari, Ku ka' mulah Rumah Kudus Tuhan Allah te bukai, te nadai dapulah ensia.’ ” ⁵⁹Uleh apa te sida' padah nya' nise' sama aba' te bukai.

⁶⁰Baro' Imam Besai diri de tengah kebala urang banyau te begugo' nya'. Ya nanya' ke Isa, “Ngapa dire' nitau' nyawot apa te datudoh sida'?” ⁶¹Isa nadai nyawot ya sama skale'. Sunye' mah Ya. Baro' Imam Besai nanya' ke Ya age', “Meh to' Al Maseh, Anak Tuhan Allah?” ⁶²Isa nyawot ya, “Au' Ku mah Ya aba' kita' ka' meda' Ensia te datai ari Tuhan Allah dudok de sepiyak kanan te Ma Kuasa. Aba' kita' ga' jemah meda' Ya ka' datai de atau awan ari sruga.” ⁶³Keba' nya' Imam Besai nya' minsak baju ya kedire' nema ngangap Isa mlicak Tuhan Allah. Imam Besai madah, “Kita nadai perlu kebala saksi age'. ⁶⁴Kita' udah ninga Ya mlicak Tuhan Allah! Kati Ya to' kena' skale' salah?” Uga' sida' madah Ya salah aba' patot daukom mati. ⁶⁵Dua tiga iko' urang blaboh ngeludah Ya ngau ngemalu Ya. Sida' nutop mua Ya aba' ngucoh Ya. Sida' begurau Ya aba' madah, “Eh nabi, cuba padah ke kami sapa te mangkong Meh?” Baro' kebala penyaga blaboh mangkong-malo' Ya ga'.

Petros madah dire' nadai nglala Isa

(Luk. 22:56-62)

⁶⁶Tengan nya' Petros age' adai de laman. Uдах nya' siko' pemanto' te ino' te bekreja de rumah Imam Besai, datai kiya'. ⁶⁷Pas ya meda' Petros tengang ngangat tuboh ya semak api, ino' nya' mrati Petros amat-amat. Baro' ya madah ke Petros, “Meh sige' kawan Isa, sida' Nasaret nya'.” ⁶⁸Uleh Petros madah ke ino' nya', “Ku nadai nglala Urang nya', ku nadai nyarok te depadah de!” Uдах nya' Petros angkat ke laman mua semak pintu gerbang. Tengan nya' ga' manok engkukok. ⁶⁹Pelayan ino' nya' meda' Petros age', ya madah ke kebala urang te diri diya', “Urang to' salah siko' muret Isa.” ⁷⁰Uleh Petros tengek ngai ngako', ente' ya nglala Isa. Nadai lama' udah nya', kebala urang diya' madah ga' ke Petros, “Meh pesti salah siko' ari sida' nya', nema meh sida' Galelia.” ⁷¹Baro' Petros blaboh besumpah ngau bamat-amat, aba' madah, “Ku amat-amat mah nadai nglala Urang te kita' cakap ke nya'.” ⁷²Tengan nya' manok renyau engkukok te kedua kale'.

Keba' Petros ingat Isa udah madah ke ya, “Sebedau manok engkukok dua kale', meh udah tiga kale' madah meh nadai nglala Ku.” Uдах nya' Petros ma riyu bluma' ya nyabak sikok-sikok.

Isa debai' ngadap Platos

(Luk. 23:1-5, 13-25)

15 Lam-lam panam kebala kepala' imam, kebala pemimpen sida' Yahudi, kebala urang te ahli de alam kitab te datules Musa aba' kebala anggota te bukai ari Pengadel Agama mulah rapat. Sida' nyuroh kebala urang masong Isa. Baro' sida' ngiring Isa ngusong Platos, te jadi gubernur tengen nya'. Sida' nyerah Isa ke ya. ²Platos nanya' ke Isa' “Kati amat mah Wan Raja sida' Yahudi?” Isa nyawot ya, “Dire' mah te madah piya'.” ³Uдах nya' kebala kepala' imam nudoh Isa mayoh mulah utai te jat. ⁴Baro' Platos nanya' age' ke Isa, “Ngai Dire' ngelawan te datudoh sida' piya'? Dinga kah sida' nudoh Dire' mulah mayoh utai te jat.” ⁵Uleh datai ke siket Isa ngai nyawot Platos age', nya' ngasoh Platos ampal amat. ⁶Ngenap kale' sida' Yahudi ngeraya Paskah, sengket Platos ngelepas siko' urang te daukom ari penyara. Kebala sida' Yahudi tau' mileh sapa ja' urang te dalepas nya'. ⁷Tengan nya' adai siko' urang te nama Barabas tengen dekurong alam dapenyara. Barabas dapenyara aba' kebala kawan ya. Sida' detangkap tegal ngelawan pemerintah Ruma aba' tegal munoh kebala urang. ⁸Keba' datai mah urang banyau de mua Platos, sida' minta' ke Platos isa' ya ngelepas siko' urang te dapenyara upa sengket. ⁹Platos nanya' ke sida', “Kati, kita' ka' ente' ku ngelepas Raja sida' Yahudi to' ke kita'?” ¹⁰Platos tau' amat bada' kebala kepala' imam udah nyerah Isa ke ya nema sida' iri ati ke Isa. ¹¹Ninga Platos madah piya', kebala kepala' imam ngumok urang banyau isa' minta' Platos ngelepas Barabas. ¹²Baro' Platos nyawot urang banyau, “Jadi, asa ku ngelepas Barabas, apa te kita' kedeka' ku puluh kah ke urang te kita' sebot ke Raja sida' Yahudi to'?” ¹³Ninga apa te jako' Platos, sida' mangkes, “Paku ke Ya lah de kayu saleb!” ¹⁴Uдах nya' Platos nanya' age', “Ngapa? Apa pemenyat te udah Ya puluh kah?” Uleh sida' empala kuat mangkes, “Paku kah Ya de kayu saleb!” ¹⁵Platos ka' ngasoh ati kebala urang banyau gaga. Keba' nya' ya ngelepas Barabas. Baro' ya ngasoh urang nyimat Isa ngau tali. Uдах nya' ya nyerah Isa ke kebala prajuret Ruma isa' sida' maku Ya de kayu saleb. ¹⁶Uдах nya' kebala prajuret ngireng Isa ke laman de alam istana Platos. Sida'

ngumai uga' prajuret Ruma te kebukai begugo' den. ¹⁷Udah nya' prajuret Ruma nyarok ke Ya jubah ungu. Sida' ga' mulah mahkota ari kebala dan te bedure' aba' nepo' de atau pala' Isa. ¹⁸Udah nya' kebala prajuret nya' mre' salam hormat ke Isa, budi-budi sida' hormat ke Ya. Sida' madah, "Idop, Raja sida' Yahudi!" ¹⁹Sida' mangkong-malo' pala' Isa ngau kayu aba' ngeludah Ya. Baro' sida' budi-budi nyungkon nyemah Ya. ^{20a}Udah sida' bado' mlicak Isa, kebala prajuret nya' nyiah jubah ungu ari Isa. Baro' sida' nyarok baju Ya age'.

Isa desaleb

(Luk. 23:26, 33-43)

^{20b}Udah nya' sida' ngemai' Isa kluar nema sida' ka' maku Isa de kayu saleb. ²¹Breta sida' bejalai, mansa' siko' urang te nama Simon. Ya ari desa ka' ke kuta. Simon asal ya ari kuta Kirene. Nama anak ya Aleksander aba' Rupos. Kebala prajuret nya' mukong Simon ngemai' saleb Isa.

²²Kebala prajuret nya' ngemai' Isa ke sute' teban te nama Golgota. Reti nama nya' teh "Keruntok". ²³Sida' encuba mre' Isa nginom angor te decampor ke mor, uleh Ya ngai nginom nya'. ²⁴Udah nya' baro' sida' maku Ya dekayu saleb. Sida' ngelamong batu ngau ngiga' sapa te empu jubah Isa nya'. ²⁵Jalai sida' maku Isa de kayu saleb baro' jam semilan lam. ²⁶Kebala prajuret nya' nules de sute' papan aba' nepo' de atau pala' Isa, "Raja sida' Yahudi" nya' mah te detudoh sida' ke Isa.

²⁷De tisi Isa sida' nyaleb dua iko' urang te mulah pemenyat, siko' de sepiyak kanan siko' de sepiyak kiba' Ya. [²⁸Ngau cara nya' mah apa te datules alam Kitab Suci tulu amat terjadi, "Kebala urang ka' ngangap Ya sama aba' kebala urang te mulah pemenyat."*]

²⁹Kebala urang te mansa' nya' mlicak Isa. Bluma' ngilek-ngilek pala', sida' madah, "Woi! Wan ka' ngeruboh Rumah Kudos Tuhan Allah aba' ka' mulah age' alam tiga ari weh? ³⁰Turon ari saleb nya', selamat ke dire'!"

³¹Piya' ga' kebala kepala' imam aba' kebala urang te ahli alam kitab te datules Musa mlicak Isa. Sida' betimal madah, "Urang bukai Ya selamat kah, uleh Ya nitau' nyelamat dire'!" ³²Ente' Ya bamat-amat Al Maseh, Raja sida' Israel, nga' kah Ya ento' turon ari saleb, isa' kita meda' baro' tau'

* 15:28 Yes. 53:12

pecaya!" Piya' ga' dua iko' urang te desaleb de sepiyak kiba' aba' kanan Isa ga' mlicak Ya.

Isa mati

(Luk. 23:44-49)

³³Udah nya' sekitar jam dua blas tengah ari, daerah nya' sintak petang datai ke jam tiga ujung ari. ³⁴Pas jam tiga ujung ari Isa madah ngau go' te sareng, "Eloi, Eloi, lama' sabakhtani?" Reti te jako' Ya nya', "Allah Ku, Allah Ku, ngapa Wan nudi Ku?" ³⁵Adai kebala urang diya' ninga Isa mangkes. Sida' madah, "Dinga kah! Ya ngumai Nabi Elia!" ³⁶Beburoh siko' urang te diya' angkat ngame' ibos aba' encalop ke angor masam. Baro' ya namet ibos nya' de ujung tungkat aba' nyurong ke Isa, bluma' madah, "Boh kita nungo'! Cuba kita meda' kati nabi Elia datai nadai manto' Ya turon ari saleb nya'." ³⁷Udah nya' Isa mangkes ngau go' te sareng baro' Ya mati. ³⁸Tengan nya' ga' tirai de Rumah Kudus Tuhan Allah carek tebelah dua ari atau datai ke baroh. ³⁹Tengan nya', siko' kepala' prajuret diri ngadap saleb Isa meda' kati Isa mati. Kepala' prajuret nya' sige' madah, "Urang to' bamat-amat Anak Tuhan Allah!" ⁴⁰Adai ga' kebala ino' te meda' uga' utai nya' ari jaoh. Tiga iko' daentara sida' nya', Maria sida' Makdala, Salumi, aba' Maria inai Yakubos te biyak aba' Yoses. ⁴¹Kebala ino' nya' udah nrudi Isa aba' manto' Ya jalai Ya de Galelia. Adai aba' sida' mayoh ga' kebala ino' te kebukai te udah datai ke Yerosalem aba' Isa.

Isa de kubor

(Luk. 23:50-56)

⁴²Tengan nya' ari blaboh malam, aba' ari nya' ga' sida' Yahudi besiap, nungo' penatai ari Sabat Yahudi. ⁴³Keba' nya' Yusop, sida' Arimatia, siko' urang anggota Pengadel Agama Yahudi te dahormat, te ngentang Pemerintah Tuhan Allah, ya merani dire' ngadap Platos aba' minta' bangkai Isa. ⁴⁴Platos ampal ninga Isa nyau mati. Keba' ya nyuroh urang ngumai kepala' prajuret nya' aba' nanya' ya, "Kati, amat mah Isa nyau mati?" ⁴⁵Nyau udah ninga pemadah ari kepala' prajuret nya' amat mah Isa nyau

15:40 *Maria sida' Makdala* Depadah piya' nema Maria to' asal ya ari kampong Magdala, sute' kampong te adai de pesiser Danau Galelia. Ya gah dakumai Maria Makdalena.

mati, baro' Platos nyadi Yusop ngemai' bangkai Isa. ⁴⁶ Sebedau nya' Yusop udah meli kayen puteh. Uдах nya' ya nuron bangkai Isa ari kayu saleb aba' malot ngau kayen puteh nya'. Uдах nya' Yusop nepo' bangkai Isa alam sute' kubor te udah dekali de buket batu. Uдах nya' ya ngansat sige' batu besai te ngau nutop pintu kubor nya'. ⁴⁷ Pas jalai nya' teh Maria sida' Makdalena aba' Maria inai Yoses ga' adai diya'. Sida' mrati teban Yusop nepo' bangkai Isa.

Isa idop age'

(Luk. 24:1-12)

16 Breta ari sabat udah, Maria sida' Makdala, Salumi, aba' Maria inai Yakubos, meli kebala utai te ngau ngemiyak bangkai Isa. ² Lam panam ari minggu pas mataari tumoh, sida' angkat ke kubor. ³ Sida' becakup jako' sida', “Sapa weh te tau' nalau kita ngansat batu te ngau nutop pintu kubor nya'?” ⁴ Uleh pas sida' datai kiya', sida' meda' batu besai nya' udah degansat. ⁵ Baro' sida' tama' ke alam kubor aba' sida' meda' siko' urang pemuda' te ngau baju panyai puteh dudok de sepiyak kanan. Sida' ma tekanyat, ⁶ uleh pemuda' nya' madah ke sida', “Nang takot! Ku tau' bada' Kita' ngiga' Isa sida' Nasaret te desaleb nya', Ya nise' dito' Ya udah idop age'. Peda'! To' mah teban sida' mengale' Ya. ⁷ Ento' angkat ke kita' padah ke Petros aba' kebala muret Ya te kebukai. Padah kah Ya nyau dulau ke Galelia; den kita' ka' meda' Ya lah, upa te udah depadah Ya ke kita'.”* ⁸ Baro' kebala urang ino' nya' keluar angkat beguai ari kubor nya', sida' begetar aba' takot. Sida' nise' madah kebala utai ke urang tegal takot.

Isa nganya' dire' ke kebala muret Ya

[⁹ Uдах Isa idop age', lam-lam ari minggu Ya nganya' dire' ke Maria sida' Makdala. (Isa udah muru tujuh sitan ari ya.) ¹⁰ Baro' Maria angkat nusoi utai nya' ke kebala urang te aba' Isa sengabot, pas tangan nya' sida' benong tusah aba' nyabak. ¹¹ Uleh pas sida' ninga Isa nyau idop age', aba' Maria udah meda' Ya, sida' nadai pecaya'. ¹² Uдах nya' Isa nganya' dire' kedua iko' muret Ya ngau mua te bedau kala' sida' klala. Tangan nya' sniko' bejalai ke sute' kampung. ¹³ Baro' sniko' bebalek aba' madah

* 16:7 Mrk. 14:28

ke kebala kawan te kebukai, uleh kebala kawan sniko' nya' nadai ga' ka' pecaya' ke sniko'. ¹⁴ Kepanyai Isa nganya' dire' keseblas muret Ya pas sida' tangan makai, Ya ngano' sida' nema sida' ngai pecaya' aba' ati sida' ma degel, nema sida' nadai ka pecaya' ke kebala urang te udah meda' Ya idop age'. ¹⁵ Baro' Ya madah ke sida', "Angkat ke uga' dunia aba' tusoi kah Brita Bayek ari Tuhan Allah ke uga' urang. ¹⁶ Ngenap urang te pecaya' aba' depane' ka' daslamat lah, uleh sapa te nadai pecaya' ka' daukom. ¹⁷ Kebala tana to' ka' adai de urang te pecaya', sida' ka' muru sitan ngau kuasa nama Ku; sida' ka' becakup ngau kebala baasa te bedau sida' klala. ¹⁸ Ente' sida' megai ular aba' nginom racon, sida' nadai mati. Aba' sida' ka' ngletak jari sida' de atau urang te pedeh, aba' urang nya' semoh." ¹⁹ Uдах Tuhan Isa madah piya' ke sida', Ya trangkat ke sruga, baro' dudok de sepiyak kanan Tuhan Allah. ²⁰ Keba' kebala muret Ya angkat kiya'-kito' nusoi Brita Bayek ari Tuhan Allah. Tuhan Isa ngasoh sida' talah mulah kebala utai te nyaroh sampai kebala urang pecaya' ente' Brita Bayek te sida' tusoi nya' bamat-amat kena'.]